


782.17
8324
. : 7





Inches
Centimetres
1
2
3
4
5
6
7
8
9
10
11
12
13
14
15
16
17
18
19
20
© The Tiffen Company, 2007

TIFFEN Color Control Patches

碑傳集

第七冊
康熙朝功臣



卷十四
之十五

1570220

碑傳集卷十四目錄

康熙朝功臣上

相國李文襄公之芳傳 趙士麟

又李相國文襄公傳 杜臻

又誥授光祿大夫吏部尚書文華殿大學士拖沙喇哈番諡文襄李公墓誌銘 張玉書

又李文襄公傳 沈德潛

附錄十則

誥授光祿大夫勇略將軍總督雲貴兵部尚書兼都察院右副都御史

世襲一等精奇尼哈番諡襄忠趙公良棟墓誌銘 張玉書

又特進光祿大夫兵部尚書兼都察院右副都御史勇略將軍趙公神

道碑銘 嚴虞禔


誥授光祿大夫少傅兼太子太傅昭武將軍提督江南總兵官三等阿

達哈哈番諡敏壯楊公捷墓誌銘 張玉書

又重修漳浦懷德書院碑記 蔡新

靖逆將軍甘肅提督一等侯諡襄壯張公勇傳 陝西通志

碑傳集卷十四目錄



光祿大夫賜一品彝陵鎮總兵官胡公世英傳 錢維城

鎮南大將軍蟒公吉圖傳 魯曾煜

又鎮南將軍墓表 汪士銓

漢軍副都統高公必盛家傳 查義

許少保貞江右戰功記 潘耒

此處為書中內容，因字跡模糊且被圈出，故不進行詳細OCR。

碑傳集卷十四

康熙朝功臣上

相國李文襄公之芳傳

趙士麟

公諱之芳號鄴園曾祖諱鮮以公貴累贈吏部尚書正一品加三級妣

康氏繼妣任氏俱累贈一品夫人祖諱登雲號小川累贈吏部尚書正

一品加三級妣蕭氏累贈一品夫人父諱才望累贈吏部尚書正一品

加三級妣李氏累贈一品夫人人生二子公其長也豐頤偉幹幼即岐嶷

七歲就外傳偶自齋出途遇羽流請止步熟視曰瞻矚舉止俱見非常

公卿之相也居常不輕言笑講學以誠正為主十七歲入泮學使者得

卷即閱大書取字示之補濟南府庠生二十一魁鄉薦丁亥成進士己

丑授浙江金華府推官審斷虛公謝絕請託事無大小出入平反必得

其情罪之至當而後即安常云倘一事顛倒是非一人負冤不白何以

施顏面於吏民之上復禁驕將抑買民物婺郡自兵燹後士子絃誦日

衰乃進九學諸生而校藝彬彬向風焉辛卯分校得士八人皆名宿壬

辰撫按委編纂賦役全書報成條分縷析足垂永久一日撫按偕司道

嘉興錢儀吉纂錄



審事于吳山公適至武林傳令會鞫詞嚴義正剖晰詳明諸公稱曰真推官也癸巳薦舉卓異

欽賜繡蟒袍甲午四月陞刑部廣東司主事乙未

上諭各部院衙門有才優經濟堪任養民者從優擢用滿漢堂議以公

應公以俸淺辭丙申三月陞山西司員外郎是歲委修

大清律十一月遷湖廣司郎中題留久任丁酉時裁啟心郎公總理十

四司科抄每抄必再三繙閱曰各省刑獄閱實於內部若一縷可生不

為看出是由我而誤殺之也平反甚多六月遇

恩詔加一級送一子入監讀書戊戌蒙

世祖章皇帝御試簡拔由郎中補授廣西道監察御史奏請釐革私僉

民解錢糧以剔蠹窟請禁委官察勘以恤民生請嚴查假冒棍徒以清

奸弊各疏庚子代巡山西按部所歷延見士民面詢利弊風行草偃貪

墨解綬辛丑撤差回京壬寅恭人吳氏卒於京邸十月乞假旋里越明

年癸卯赴京補湖廣道監察御史請

勅部酌議追罰事例過當題為春日農務方殷踏勘似宜暫緩各疏乙

巳四月巡視西城直陳奸棍誣逃杜刁風而安民生丙午巡視兩浙鹽

課釐剔積弊疏劾商蠹革除陋例節省襍費銀兩甚多商困頓蘇差旋

戊申掌京畿道事十一月有嚴覈郡守職任最重之疏已酉掌河南道

事奏請甄別督撫以清吏治政本關係甚重票擬理宜嚴速請錢糧覺

察以杜民累請酌勒限緝賊以安民生請除無益條例以挽弊政密陳

封疆關係非輕諸疏詞指切直皆

報可庚戌內陞以正四品頂戴食俸仍留掌河南道監察御史疏請嚴

議禁止委署實病民生雜流不宜濫預以信功令以裨地方奉

旨同大學士六部都察諸臣定滿洲漢軍漢官品級考壬子陞都察院

右副都御史疏議誣良諱盜處分緝賊不宜苦累失主以戒庇盜殃民

請議參罰繁密太甚外官難於奉行巡鹽考核當有實政不宜專論課

完以恤商困以培賦源請議覺察奸蠹內外畫一諸疏本籍鄰近州縣

臨清倉米嚮解本色道里遼遠民甚苦之公議改折附入大糧民無運

費官免催提公私皆便常豐倉米原解德州民力最勞公議支兌附近

營兵月米折省無算十月陞吏部右侍郎遵例自陳奉

旨李之芳簡任佐銓著照舊供職該部院知道癸丑以兵部右侍郎兼

都察院右副都御史總督浙江等處軍務兼理糧餉陞辭

賜上殿良駟鞍轡抵任甲寅聞滇南吳逆叛查有台巡道吳應鵬係三桂姪男即會同撫提鎮檄行摘印看守密題請

旨定奪飭沿海等處重嚴武備又請增兵馬及試用火器以資勦禦固守三月靖藩耿精忠反報聞人心在在風鶴隨檄各路官兵分守要害復再疏請

勅江南省滿漢官兵調集兩省交界以備聲援江西省於廣信駐屯重兵以防崇安大關一路或有警急咨調策應四月三疏請發大兵防勦

並請勅江西督撫提諸臣亟發重兵謹守鉛山玉山大路以保巖疆又遣本標中軍副將王廷梅及薛受益等率兵防守仙霞關等處會疏請給官

兵行糧四月與將軍撫院提督公議於額俸餉銀外賞賚官兵勉以大義咸以奏銷為慮公不然以朝廷錢糧為朝廷將士之用俾出死力捍

衛封疆情理允協且揆之時勢人情洵未定小有怨望緩急未必能為用也復會杭州將軍撫院提督議駐兵衢州五月統領本標杭協營

並江南提標官兵一千五百人申嚴軍令所至秋毫無犯同平南將軍賴塔自杭赴衢先扼閩要衝賴將軍承

旨一應軍機事務與李總督商酌而行公身膺封疆重任但盡心竭力以身先之不過為危迫告急之詞惟同賴將軍於地方情形兵力多寡

事機緩急無處不為籌畫在衢滿兵一千餘綠旗兵二千餘逆賊全力屯聚清湖日窺侵犯而副都統喇哈應援之兵馬促未能至所謂孤軍

危疆無有過於此時者七月初賊犯衢公躬擐甲冑同賴將軍督師進攻於坑西大戰轟礮之聲震地流丸如雨左右請少避公曰不可三軍

司命少移動即為賊所乘矣今日之事以兵勝敗為吾死生耳介冑終日整肅軍容侈不用命者以堅士心是役也以不滿四千之兵擊賊數

萬之眾一可當百軍聲大振時逆賊披猖各路鎮營羽書旁午晝夜不下數百通無論兵一至戟門公必呼至帳前屏人親加撫慰詢賊情形示以戰守方畧令其傳語其鎮其將知親加飭勵之意而機警識破奸謀即置於法有規避退縮營將必奏參以肅軍紀三衢當衝扼要兵力單寡戰守不能兼應如金華堵禦溫處兩路嚴州接連徽饒二郡並屬咽喉之地請照例增設標兵以資勦禦密謀招降偵知九龍山偽將軍馬九玉麾下副將韓斌將兵八百人乃移文江南亳州以斌子世晉家人苑亮至令持家書并諭札縫履底中使走入斌壘一無所言遺其

履而去斌得諭札遂與僞都司王得功等商同日中奔壓潮營歸降賊
勢方張羣情皇惑請用宿將李榮統領調集嘉湖等營官兵俾之援剿
金衢等處著績疆場另募兵三千以定經制且使地方強壯有力之徒
不致爲賊引誘募兵卽所以弭盜自是處州金嚴台紹各屬相繼報捷
生擒賊首汪磐繆國英以歸恢復遂安壽昌淳安義烏東陽分水等邑
城丙辰公疏議直搗仙霞關爲一勞永逸之計請調江南松江崇明官
兵而部議以海口重防不便移調令於本省酌量遣發並將擊賊進取
事宜具奏再疏畧曰本省無可調之兵而江南有可遣之將蓋浙當用
兵之際衢州滿漢綠旗兵與賊對壘者二年餘且晝夜不解甲矣至杭
嘉湖紹之兵已經調遣略盡惟江南之松江崇明額設兵幾二萬諒此
時之賊氛必不遠及江南也至于進取之路不在溫處而在衢州故耿
逆勁卒悉萃于此此賊破則諸賊皆無能爲矣雖馬九玉朱懷德等死
守河西似難猝破然其南爲江西則常山皆有間道可襲我兵一進
使彼首尾受敵卽河西之賊壘不能獨完所謂不待交鋒而勝敗之機
早識於胸中者如此僞將軍馬九玉竊據河西以大溪灘爲糧運咽喉
又啟大將軍康親王速師前進直破其屯糧之地八月十五日大溪灘

大捷十七日遂復江山縣城馬九玉既敗遁知歸路已絕冀繞道入仙
霞關據守顧諸軍已遵公密諭疾抵關口分路夾擊僞副將金應虎等
乞降二十一日師入三關我兵獲有脅從六十餘人將置之法公曰此
是戀故土妻子保性命者耳忍殺之耶乃議盡釋之草檄宣布
皇上伐罪救民至意于是王師入閩如摧枯拉朽蕩平反掌大兵所至
居民安堵不越兩旬露布捷聞各路獲捷恢復雲和松陽龍泉三縣城
也九月疏請亟
勅部議鄰省會師合剿餘寇略曰閩逆犯浙將及三年煽誘勾連廣植
黨羽巨逆馬九玉等雖敗潰奔逃浸已瓦解而餘孽多伏匿山谷皆與
江南徽州江西饒州廣信等府緊相連接如僞總兵周立等則屯踞廣
信祝茂華等則把守玉山縣于午口與常山相距僅數十里目今逋誅
之寇散布歧界且係崇山峻嶺使彼稍延喘息勢必滋蔓難圖卽三省
接壤之間終無寧謐之時臣身處殘疆竭力整頓移會進兵仰祈
勅下江南江西督撫及統兵將軍合力夾剿則軍聲益振逋寇無所逃
誅矣遣官兵招撫江西逆寇恢復玉山縣城部議加一級丁巳處州椒
洞巖山寇悉平廣信府等處報捷恢復江西鉛山縣城又興安弋陽貴

溪等縣百姓歡欣歸命江右未平餘孽屯聚地方逼近浙省門庭百姓
久罹湯火且總屬朝廷封疆公不敢歧視題請會勦鄰界漸靖惟偽總
兵馬鵬數稱梟惡聚眾於開玉交界之陳村及德興之白沙關跳梁怙
惡公密飭副將武榮蔣懋勳等自白沙關直抵德興搗其老巢連破賊
寨木城陣斬偽將數十員生擒鵬歸數以大義誅之凡調遣所屬綠旗
各路將士大小一百四十餘戰舉旗斬馘所向克捷皆仰
天威遠震蕩平捷于影響克奏膚功恢復鄰疆三藩并叛惟平閩獨先
則公首扼衢州之力也九月為欽奉

上諭事部議飛報官兵大捷等事俱係調度有方擒斬逆賊兵一十四
案酌量議敘奉

旨李之芳著加兵部尚書仍兼都察院右副都御史為正一品照舊管
事拜疏謝恩公思平賊之後事之重大而最急者惟有仰遵

恩詔將應行蠲免賑恤事宜亟請大沛

皇仁以救垂死之百萬生靈經三疏迫切籲陳浙東金衢嚴溫處五府
屬殘黎阨危慘苦情形請將康熙十六年以前一應本折錢糧盡予蠲
免而部議以江山等縣衛所並未確查分別苦累輕重復具疏四請略

云恤民以固邦本裕賦以資國用兩者原屬並重然必使有可存之民
而後有可徵之賦被賊蹂躪之地室家離散田廬蕩然雖哀鴻甫集而

饑寒并切若不急沛

恩綸無論舊逋終不能完徒使新逋愈積現徵復虧即日黜一官無益
於事每念兵革之餘傷慘已極欲期民皆樂業復還舊觀實非易事惟

蠲此不可復徵之賦而休養生息仍成

國家財賦之地者即于此屢籲

宸聽為恤民計未嘗不為籌餉計也當年倉卒用兵之際師行糧從軍
糈未辦先有追回已解閩餉一十五萬兩貯衢州府庫得資官兵俸餉

士馬賴以飽騰安輯投誠凡捐賞袍帽銀物屢經各疏題明支用餉銀
及措墊清冊悉聽部議開銷無敢假借虛冒者較鄰封用兵節省錢糧

無算而格於部議卒蒙
恩旨允銷公常云軍中刑賞關係甚重一言不當一事不協大事隳矣
奉部文題用文武各官不惟不徇人情亦且不徇己意皆較公量能毫
髮無私雖干把微員拔用一人三軍無不服其至公蓋為各路衝鋒對
壘勞苦有功者不乏其人若舍此不用而以未有真功實苦者倖授則

行間將士誰復肯致命宣勞爲國固圉乎故人心競勸性命可捐何敵
不破所以各路兵行處處獲捷政亦得力于此耳由偏裨弁目拔擢至
提督總兵官如陳世凱李華吳英等二十餘人勇略茂著上徹
天聽舉薦賢良屬官人未嘗知有知者或以牲牢之物稍佐軍需必卻
之日凡所犒賞軍中無不知其所由來蓋所爲者極難庶足激勵眾心
能得其死力耳嘗面誡屬官曰時雖多事蕩平不難若輩存心行事仍
作太平無事時觀朝廷功令無寬假余爲朝廷執法之人亦不敢寬假
也然清嚴而不刻每曰仲尼不爲己甚亦未嘗輕劾一官己未三月具
疏自陳乞罷奉
旨卿才品優長簡任總督殫心料理效力行間著有勞績著照舊供職
該部院知道七月會地震
詔求直言疏陳四事請復給難民子女請免荒絕丁糧請復設各省理
刑請復生童舊額具疏彙報招撫浙江江西等處投誠各案文武僞官
共六千二百餘員僞兵人等共一十六萬五千五百餘名各給賞分別
歸農入伍俱奉有
具見悉心籌畫勦撫並用可嘉事平議敘之旨樞部議敘武職軍功其

加二十九等紀錄一十九次銓部議敘加三級以尙書正一品照舊管
事庚申題請操練戰船襲擊海寇密飭定海鎮一遇警息知會巡海部
臣點驗出洋掩擊於孝順洋斬獲奏捷以示大創又請
勅部議調福建水師分駕戰船一百號由是閩洋直趨温台浙省水師
由定關會師夾勦一切島窟更請會勦事竣卽以閩來戰船分泊温台
配兵守汛在浙可無成造之費在閩可免修艦之煩以寬物力而省錢
糧一舉而數善備矣辛酉會題楓嶺營循照舊制浙閩制省要害之地
鞏固邊防公從康熙十三年驅師捍禦任艱責鉅外禦方張之寇內顧
征勦之兵旣圖固此民心又恐有隳士氣千思百慮惟期有濟軍機無
債事勢多方調度靖寇安民上賴
廟謨制勝下得將士奮勇爭先平定疆圉至避亂難民亦有淪陷日久
脫走來歸者每加撫慰量給銀米嗣是來者日眾億萬姓扶老攜幼鶉
衣鳩面無家可依因遣員于龔家埠權爲茅屋二千餘間以居之每名
口捐米七合以給饗飧飭令分別男女不致襍處然而軍興公帑不可
輕支乃與撫院陳公量議捐助而身爲之倡有田可耕更給民牛種而
民之來歸者益多並無失所之歎又於西安之柏陵街及江郎街廿八

都保安橋等處皆入閩通衢設廠煮粥施湯嵩委標員管理凡五年賑濟過往來人夫饑民一百二十二萬一千五百名有奇雖兵燹之後民無供役之苦壬戌八月奉

詔班師十一月遷掌中樞癸亥四月赴兵部尚書任辨官論材陟罰臧否一以無我行之為僚屬所敬服甲子八月陞吏部尚書飭諸吏無得升堂使坐曹聽行文書而已由是吏不得與銓事予奪一秉至公居月餘翕然聲動京師乙丑夏六月周因積勞成疾肩患癰腫蒙

皇上遣御醫大夫劉存恕祈嘉到至邸中診視所需藥餌於尚方御藥房支取調治月餘時復存問然年逾六旬氣血衰羸具疏懇請解任奉旨卿才品優長簡任銓衡正資料理著照舊供職不必以老病求請解任該部知道丙寅春查敘軍功浙江總督調官兵有方在温州擊敗水陸逆賊生擒偽副將何賓等五百名賊陣斬偽都督孫可德等賊兵一萬有餘在大溪灘賊二千四百餘名由空銜授為拖沙喇哈番准襲一次註入山東濟南衛丁卯八月再疏求罷歸田里奉旨卿才品優長簡任銓衡正資料理著照舊供職不必以衰病求罷九

月入閣辦事公深荷

知遇殫心職業辨色趨朝嚮晦而退凡有應對虛公審慎不肯唯諾退而自省曰

主上聖明萬機畢照閣臣備位愧無以仰贊高深未能免素餐之譏也

奉 勅充政治典訓

大清會典 大清一統志等書纂修總裁官

賜元狐帽裘戊辰以疾荷恩原品致仕懸軌養疴己巳春月上南巡道由德州公及地方文臣巡撫以下武臣總兵官以下與在籍

諸臣迎 聖駕伏謁道左

皇上勒馬垂問你病好了麼回奏臣病好些了

恩賜上尊玉粒果品慰勞甚厚復詣行在候起居時遇赦免東省錢糧叩謝上又問住處離海遠近來路多少尙有筋力能乘馬至此耶卽一一回

奏甲戌十一月病勢瀕危伏枕口授遺疏謝恩越宿而逝疏上聞奉
旨李之芳効力年久前在浙省時隨大軍進剿歷有勞績簡任機務勤
慎素著忽聞在籍溘逝朕心深切軫惻應得卹典著察例具奏該部知
道禮部准吏部咨稱原任文華殿大學士兼吏部尚書正一品又加三
級休致回籍李之芳病故應照定例卹典與現任官同按其加級品級
給與全葬之價並給一次致祭銀兩

遣官讀文致祭應否與諡伏候
上裁等因康熙三十四年二月初九日題本月十一日奉

旨依議還與他諡

賜諡文襄公生於前明天啟壬戌年八月十八日卯時卒於康熙甲戌
年十一月初二日未時壽七十有三餘詳于行述中不具載
論曰吾觀文襄公生平大節而知儒者有用之學也學匪適用謂之腐
儒樸橄沾滯褊瑣拘陋僅僅不敢踰尺寸奚補于世然使而不由于學
揮霍震掉出之無本雖鴻猷碩譽錫耀一時譬之無根之木無源之水
扶疏衍溢槁涸可立而待君子弗貴也知此始可以議古人經綸之業
矣公少負奇氣英睿倜儻不泥於習及長有志聖學入仕以來務為建

立翼宣禮樂慨然以斯世斯民為己任而才足以達之得第筮仕節推
卽赫赫有聲列臺憲繩糾激揚風裁彌峻擁節麾開幕府中外敷歷不
阿權貴不避艱險值三逆叛耿精忠窺浙思逞公當半壁長城躬擐甲
胄馳驅于疆場壁壘之間奮不顧身忠勤以為國誠信以事君踽踽孤
踪屢邀

聖眷其始也疏請駐兵衢州請調江南滿漢官兵以備聲援調江西屯
駐重兵以待策應又請急發大兵防勦請給行糧議給賞賚以示鼓勵
及賊犯衢州破賊數萬於坑西生擒賊首汪馨繆國英敗賊首馬九玉
朱懷德於大溪灘分路夾擊偽副將金聲虎等乞降遣副將武榮蔣懋
勳由白沙關抵德興搗偽總兵馬鵬之穴而生擒之于温州擊敗水陸
逆賊生擒偽副將何賓等陣斬偽都督孫可德等賊兵一萬有奇於曹
平關殺賊五千餘名大小一百四十餘戰塞旂斬將同大將軍賴塔所
向克捷三逆并叛平閩獨先公與將軍扼衢州之力也平賊之後黎赤
阡危事之最大而急者莫若歷年逋賦公數請浙東金衢嚴溫處五郡
自康熙十六年以前錢糧宜豁蒙恩盡予蠲免仍捐俸勸賑施粥以濟
饑民全活無算班師論功議敘晉中樞歷冢卿入內閣皆密勿要地務

抑僥倖絕徑竇門無私謁邸第肅清及
子歸名完而節亦全焉今夫祿位名壽皆天之所以命于人而人之所
以自奉於身者也夫德之人必得若執左券以索寄然者是非有心於
得之也嘗讀易師之九二曰在師中吉王三錫命謙之九三曰勞謙君
子有終吉公以師中之吉荷三錫之命則既已承天之寵矣勞而能謙
乃克有終固公所以自期以圖報于終身者也夫角與而齒缺翼附而
足虧在物且然況于人乎歷觀五代以後大臣善處成功之際而能保
有終吉者幾何人祿盛者或晦于名位尊者或劣於繼名高者或嗇于
壽而壽永者或儉於祿與之翕張損益雖大化司其柄者要本於生平無
欲無欲則無我天地萬物皆吾一體莫非我也公心慈量宏平日以厚
自處未嘗有讐物害人之心履信思順鬼神實相之不然權位重而責
愈備經費浩而迹愈疑以一人之情擅一方之刑賞而德怨易至於橫
生以一人之力副千萬人之祈望而恩澤每病于難溥夫以不平之心
加之以求全之意則夫忌疾疑謗之來固宜有所不免然志定而才裕
識先而資深培根濟源枝派暢遂性本近道內夷城府外弛邊幅雖處
兵革紛冗之中亦未嘗廢學居常油然情雖暢而不輟臨變惕若志雖

鬱而不撓度能容眾似混而辨機能料敵似顯而藏至于忙中批答醉
中應酬卽倉卒憤擾之餘可以覆覈百十未嘗遺一此不用之用其用
始神無功之功其功始大非易易也昔夫子導諸子言志於季路則哂
之於曾皙則與是豈有遠於恆情哉季路得國而治加以師旅因以饑
饉可使有勇而知方固非託諸空言者也較諸履素樂常浴沂風詠同
於太虛而無累於外物者以其無欲且無我也富貴不能淫貧賤不能
移威武不能屈至誠淵淵浩浩毫無所倚故曰苟不固聰明睿知達天
德者其孰能知之人尚勉於學哉

又李相國文襄公傳

杜臻

公姓李氏名之芳號鄴園其先自棗強徙居濟南之武定州遂世爲州
人曾祖鮮祖登雲父才望皆以公貴贈吏部尚書公幼而岐嶷七歲就
外傳遇羽流熟視曰舉止非常公輔器也順治丁亥成進士筮仕金華
推官時鎮帥馬進寶縱兵擾民公力禁癸民賴之其決讞也虛公而明
敏直指杜果按部令公攜文牘往公曰不須攜也是日決數十案纖悉
無遺果大奇之臺司會鞠於吳山公適自婺至上謁留公公立爲剖晰
羣以眞推官目之居五年郡無滯獄以治最入爲刑部主事歷進郎中

會六部裁啟心郎屬公總理十四司覆奏事宜多所平反戊戌遷監察御史庚子按山右康熙丙午視兩浙鹽筴庚戌內陞支四品俸仍掌河南道事擢都察院左副都御史公在臺前後凡十有三年章數十上如糾學臣之溺職司道之徇庇科臣之比匪相臣之市恩甄別督撫嚴覈郡守慎重票擬杜絕誣逃文法太密者宜寬捕盜貽累者宜禁皆有關於體詞指切直識者偉之他若臨清倉徵本色常豐倉輸德州轉輓勞費無限公一議改折附入大糧一擬支兌附近營兵於國計既有裨而鄉之人尤頌公之德於不衰未幾晉吏部侍郎癸丑夏以兵部侍郎總督浙江軍務浙人聞公至莫不舉手加額以公復來爲厚幸先是公在御史臺時念天下承平日久而三藩負固遠疆慮萌異念有密陳封疆之疏下車未久是年冬吳逆叛於滇明年春耿逆叛於閩人心在在風鶴公曰閩與浙輔車相依浙之門戶在三衢固守衢則全浙無虞矣我受封疆重任有進無退若不先據要害其何以濟於是請調江南兵駐二省界並發江西兵屯廣信防崇安大關守鉛山玉山以備聲援五月公率兵千五百人同平南將軍賴塔自杭趨衢以扼其衝公以家財募五百人甘苦與共每夜漏下數刻公短兵戎服雜處行間申嚴警備達

旦不寐率以爲常七月賊犯衢遇於坑西礮聲震地流丸如雨左右請少避公曰三軍司命不可動也動則爲賊所乘今日之事以兵勝敗爲吾死生可稍怯耶於是人人殊死戰以不滿四千之兵擊賊數萬之眾無不一以當百賊大敗公慮金華爲溫處要衝嚴州爲徽饒連境請設兵以資勦禦時九龍山僞將軍馬九玉張甚偵知其麾下副將韓斌擁兵八百人密謀招降之乃檄江南亳州以斌子世晉及其僕苑亮至公以諭札與之縫履底走入斌壘遺其履斌得之遂同僞都司王得功降而九玉失一臂矣然九玉蟻聚河西羣不逞之徒觀望其間公曰此輩爲賊誘則勢益張矣不如因而募之得敢死士三千人軍聲大振而金嚴台紹處亦各相繼報捷生擒賊首汪馨繆國英而遂安壽昌淳安義烏東陽一時恢復公以賊勢少殺宜直搗仙霞關爲一勞永逸計請調江南之松江崇明兵部以海口重防未便移調仍令於本省酌遣且令公條上進取機宜公言本省無可調之兵江南有可遣之將浙之兵與賊對壘晝夜不解甲者二年餘矣各郡之兵調遣畧盡彼松江崇明額設兵二萬諒此時賊氛必不能遠及江南也至進取之路不在溫處而在衢逆賊勁卒悉萃於此此路破則他無能爲矣雖馬九玉朱懷德等

死守河西似難猝破然其南江山其西常山皆有間道可襲我兵進彼首尾受敵即河西賊壘不能獨完矣蓋公之不待交鋒而勝敗之機蚤決於胸中者如此九玉屯糧大溪灘公搃其餉道八月大戰克之九玉遁走仙霞關公設伏擊之降其偽副將金應虎等師入三關獲脇從數十人將置之法公曰此戀故土迫於賊威耳盡釋之師遂入閩所至獲捷餘孽之伏匿山谷者在江南之徽江西之饒信間公慮散布歧界多崇山峻嶺使稍延喘息勢必滋蔓疏請江南江西會師協勦踰年浙東盡定隣省諸郡亦殲除幾盡惟偽總兵馬鵬猶跋扈於開玉德興間公遣將破其寨生擒誅之殘孽悉平公自用兵以來率諸將士大小一百四十餘戰所向克捷而三逆之平八閩獨先則公之身先扼衢力也捷聞加兵部尙書正一品公念賊平後事之大者無如蠲賑請豁浙東金衢嚴溫處五郡十六年以前額賦部議持不允公四請之上言恤民以固邦本裕賦以資國用二者並重然必有可生之民而後有可徵之賦浙東向爲賊所蹂躪田廬蕩然今雖哀鴻甫集而饑寒並切若不急爲蠲豁無論舊逋無償勢且新逋愈積即日黜一官何益於事惟蠲此不可復徵之賦則休養生息仍成國家財賦之區矣

詔從其請初倉卒用兵軍精未辦先有追回已解閩餉一十五萬兩存貯衢庫凡一切軍前犒賚公各疏題明支用較隣省節省無算雖格於部議卒蒙

旨允銷貧民陷賊來歸者公親加撫慰建茅屋二千餘間於龔家埠分別男女以居之給以饗殮有田可耕者給以牛種於八閩通衢柏陵街江郎街保安橋等處設糜以賑饑者凡五年濟饑民一百二十二萬一千五百有奇前後招撫僞員六千二百有奇僞兵人一十六萬五千五百有奇皆給賞有差歸農入伍事既平論功中樞敘武職加二十九等銓司敘文職亦如之獨以督臣轄全省不敘奉

諭旨酌加三級久之追論温州之捷大溪灘之捷曹平關之捷授公拖沙喇哈番襲一次或以爲酬庸稍薄公瞿然曰此出自特恩雖分茅胙土榮莫踰焉且叨冒世職於臣分已過公可謂不伐其功者也公自擊賊入閩既已翦蕩陸寇而海上游魂猶有出沒者乃請練習戰船以襲之閩省水師由閩洋趨溫台浙省水師由定關會師以夾勦諸窟鳥事竣即以閩船分泊溫台配兵守汛在浙無成造之費在閩無修艦之煩兩省便之又請楓嶺營兵舊制浙閩分轄今以援勦之

兵調補則餉不加增而三省要害之地以固矣此又公之斟酌盡善爲
守禦計甚周也公駐衢區畫凡八年壬戌秋班師公還杭冬
召入爲兵部尙書甲子秋進吏部尙書飭諸吏聽行文書而已毋得上
堂與銓事宿弊一清明年夏患癰

上遣御醫視疾給尙方藥餌公以老疾請
優旨慰留丁卯再疏求罷不允是年秋以吏部尙書入爲文華殿大學
士居政府邸第蕭然門無私謁明年春致政歸居平無他嗜好以書史
自娛者七年卒公豐頤偉幹美鬚髯性介直以誠正自矢念念可質鬼
神其爲司李嘗云有一事顛倒是非一人負冤不白何以施面目於吏
民上其在秋官云各省刑獄閱實於內部若一綫可生不求其生是由
我誤殺之也其巡視鹽筴也効商蠹革陋習節省雜費商人賴之其在
行間云軍中刑賞關係最重一言不當一事不協大事隳矣當羽書旁
午或官或兵至鈴閣者必呼至帳前屏人慰勞詢賊情形示以戰守方
畧推心置腹以飭勵之其薦拔文武諸人量能授職出於至公自偏裨
弁日至提鎮者如陳世凱吳英李華等凡二十餘人皆以勇畧著所舉
文吏吏未嘗知有知者或以牲牢佐軍需必卻之且戒曰時雖多事蕩

平不難朝廷功名無容寬假余爲朝廷執法亦無容寬假也然清而不
刻每曰仲尼不爲己甚其爲人公正而仁恕類如此故人皆樂爲用

上亦稔知其功當家居時

乘輿南巡過德州公迎謁道左

天語詢問曰卿筋力尙健能乘騎至此耶

賜上尊玉粒慰勞倍至卒之日

天子猶念其爲浙督時進勦勞績任機務時勤慎素著忽聞溢逝深爲
軫惻也

子祭葬諡曰文襄享年七十有三公嘗言士大夫有名節易全名節難
跡公之生平真可謂名完而節全也已所著有棘聽草奏疏文移諸藁
若干卷子男四人孫男十五人長子鍾麟以蔭授岳州同知遇楚兵變
攝巴陵亦有戰守功擢知湖州府且將大用君子謂能世其家焉

論曰歷觀古之名臣如唐之裴李宋之韓范才兼文武出入將相者代
無幾人如公之忠誠奮發芟除渠魁身歸臺閣光贊密勿方之前哲何
多讓焉臻浙人也公之功著於浙臻嘗過里中公留以脫粟一飯語子
曰用兵之際任事固難賊平之日善後尤難當日俘獲山野長髮其中

真寇無幾率皆脇從也為予鞠其冤者悉縱之去至於此離婦女什伯
為羣指以賊婦盡據而有矣乃率先捐俸以贖之俾良民家產復聚金
衢嚴溫處五郡居民失業者數年雖荆棘已除而生聚有待為之力請
於朝蠲從前逋賦此三事者予之所謂善其後也聆斯言也公之為德
於浙深矣初康親王之入閩也諮公以平閩大計公曰仗

天威憑

廟謨以順討逆勢如拉朽王嚴禁軍士不姦淫不搶擄則計日蕩平矣
後果如公言此公之為德於閩而人莫知也語云活千人者封公之活
浙人無算子孫之實蕃且碩也有以夫至今浙之人世世奉祀不絕也
又誥授光祿大夫吏部尚書文華殿大學士拖沙喇哈番諡文襄李公

墓誌銘 張玉書

康熙三十三年冬十一月文華殿大學士武定李公薨于里第訃聞

天子眷念勞臣輟朝軫悼

詔所司議飾終之典賜祭賜葬悉從優渥比易名奏請

上特予文襄本朝文臣自洪南安以後稱文襄者至公而再見一時中
外翕然以為允協云公舉順治四年進士起家浙江金華府推官居五

年郡無滯獄以治最入為刑部主事歷進郎中會六部裁啟心郎屬公
總理十四司覆奏事宜聲譽大起十五年擢監察御史明年出按山西
甫半載墨吏皆解綬去康熙初視兩浙鹽課力甦商困在臺十餘載數
上封事如慎重票擬甄別督撫嚴覈郡守皆有關治體典內外計屏絕
私弊丰裁凜然九年八月內陞支四品俸仍掌河南道事十一年超拜
都察院左副都御史抗疏陳時事謂文法太密等於東濕緝盜無術累
及失主吏治民生胥受其病識者韙之是年冬擢吏部侍郎十二年夏
命以兵部侍郎總督浙江軍務蒞事甫兩月而滇逆變作十三年春請
亟增額兵用資勦禦踰月閩逆告變公隨檄諸路將士分守要害遣副
將王廷梅薛受益等力堵仙霞關又請調江南滿漢官兵駐二省交界
並發江西重兵守鉛山玉山以壯聲援因會疏懇給官兵行糧軍士皆
感奮是時逆賊盡銳聚湖清日謀窺犯公偕平南將軍賴公塔率滿兵
千人緣旂兵二千人並所募健勇五百人以五月自杭趨衢州七月賊
軍數萬攻衢我軍眾寡不敵公同平南將軍以義激勵將士進擊於
坑西礮聲震地流丸如雨左右請少避公不可曰今日之事以兵勝敗
為吾死生可稍怯耶諸將鼓勇直入一可當百賊遂卻顧賊黨羽方熾

溫處金嚴各屬所在煽亂公雖以計招降偽將韓斌王得功生擒賊首汪磐繆國英而兵單勢分難以久持十五年夏公遂建議直搗仙霞關為摧堅制勝之策部議令公條上進取機宜公言進取之路不在溫處而在三衢今逆賊勁卒悉萃于此此賊一破則諸賊必皆駭亂逆散雖偽將馬九玉朱懷德等抗拒河西大溪灘而江山常山之間有間道可襲我軍進擊使賊首尾受敵河西孤壘安能獨完故擊之便時和碩康親王軍駐金華公力請至衢八月合軍克大溪灘復江山縣馬九玉猶冀繞道奪仙霞關而諸軍已受公密檄急據關口夾擊賊將金應虎等窮蹙迎降大帥遂入閩閩逆既平而餘孽竄伏山谷間者尚繁公復請江南江西會師協勦踰年浙東及徽饒廣信諸郡以次底定捷聞進秩兵部尚書加正一品公念賊平之後事之最急者無如蠲免賑卹疏請豁金衢嚴溫處五郡十六年以前額賦部議持不允公上言卹民以固邦本裕賦以資國用兩者並重然必使有可生之民而後有可征之賦浙東被賊蹂躪饑寒交迫使非急于蠲免則舊逋既缺新逋愈積即日黜一官於事無濟且蠲此不可復征之賦俾民得休養生息以供將來之稅正所以為國家財賦計也

詔從公言貧民陷賊中來歸者公悉為區畫衣廩又設糜於通衢賑往來饑民一百二十二萬有奇流移之人盡復故土方事之殷也羽檄旁午人情惶懼東南數千里惟恃公一人以為安危孤軍扼險摺拄三載卒使浙水以西無匹馬擾于境上則皆公守三衢力也假若三衢無公矣越之民幾不能一夕安枕而公之功豈不偉且烈哉公以文臣身擐甲胄冒矢石大小一百四十餘戰所向克捷雖行間宿將皆遜謝不如而部議敘錄僅及十之一二前後招降文武偽員六千二百有奇賊兵一十六萬五千五百有奇中樞敘武職加至二十九等銓曹敘有司亦如之獨以督臣轄全省不敘再奉諭旨乃酌加三級久之追論溫州擒斬逆賊及大溪灘曹平關破賊功授公拖沙喇哈番襲一次或有言公保障著勛酬庸稍薄公瞿然曰凡此敘錄皆出特恩雖胙土之榮無以或過且叨冒世職與洪南安比更何缺望焉公之勞而不伐有古大臣風矣二十一年秋以事平還杭州冬召入為兵部尚書公久于兵間在部一切措注悉中機要二十三年進吏部飭諸吏坐曹聽行文書無得與銓事宿弊一清明年夏患癘

詔遣御醫診視頒尙方藥物既愈以老疾請
優旨慰留二十五年復請詞益切不允是年秋
命以吏部尙書入爲文華殿大學士辦理機務明年春致政歸二十七
年

乘輿南巡過德州公迎謁道左

天語詢問曰卿精力尙健能乘騎至此耶

賜上尊玉粒慰勞倍至里居凡七載泊然無嗜惟以書史自娛臥病數

日遂逝距生前壬戌八月十八日年七十有三公初在言路以謇諤聞

彈劾貴要絕無鯁避既督兩浙則沈毅持大體不輕言笑而批答案牘

能曲盡物情入筦部務嶽嶽無所詭隨每

國家有大議片言擘畫確不可易中外敷歷四十年以精勤奉職以誠

恪事

主以天下善人君子得行其志爲愉快嘗言士大夫有名節易全名節

難如公之立身服官始終一節真可云粹然無疵者矣以擬昔韓范司

馬之倫其奚愧與公諱之芳號鄴園先世自直隸棗強遷武定曾祖諱

鮮祖諱登雲考諱才望皆以公貴累封光祿大夫吏部尙書曾祖妣康

氏任氏祖妣蕭氏妣李氏俱累贈一品夫人元配胡氏封恭人贈一品

夫人繼張氏封一品夫人生四子長鍾麟筮仕岳州府同知夏逢龍之

亂以守城功陞廣東潮州府知府次攀麟候選行人司司副早卒胡夫

人出次容麟虞膳生次宜麟候選通判側室出娶皆名族女二人長適

候選京職王爾梅次適虞膳生馮雲勤胡夫人出孫男十四人鍾麟出

者十人壽泓壽澎壽滬壽湜壽漢壽沅壽湘壽演壽潮壽淞攀麟出者

四人壽澄壽瀉壽溥壽滋曾孫男二人本篤本厚壽泓出公從子姓麟

舉丁丑進士館選時

上詢知家世遂擢入庶常

聖心眷公之深歿而不能忘聞者皆爲感涕鍾麟將以康熙三十六年

九月初五日奉葬東原塋兆以某爲年家子屬爲銘誼不敢辭謹據狀

次第行實而系以銘曰

嶽鍾元氣公生應期持憲於朝正色侃辭咨命制府鎮東南陞三孽相

挺註誤烝黎七閩震鄰阻險以窺屹然一身

天子倚毗遮扼要害危疆是措摧厥凶鋒用濟我師掃蕩廓清海邦載

釐百戰之勛勒于鼎彝

召還廟廊以式庶司典樞典詮爰秉國維投老崖壑優游自怡出入將相黃髮羽儀韓琦隕星傳說乘箕偉烈不朽銘石永垂

又李文襄公傳

沈德潛

公諱之芳字鄴園姓李氏山東濟南府武定縣人中前明崇禎壬午鄉試

國朝順治丁亥成進士除浙江金華府推官六載陞刑部主事旋陞郎中公嘗謂各省刑獄閱實內部若有一縷生路不求其生是由我殺之也審定囚籍多所平反五載授廣西道監察御史旋掌陝西道事代巡山西康熙元年停止巡方補湖廣道御史五載掌京畿道事又一載掌河南道事三載陞都察院左副都御史公在臺中共十有四年凡所建白關朝野大利弊彈劾不避權貴人咸畏之未一載陞吏部右侍郎明年以兵部左侍郎總督浙江軍務時十二年癸丑冬月也明年逆藩耿精忠之亂作先是吳三桂反雲南遠近震動公密疏請增設各路兵馬謂方今滇逆反叛賊氛未靖尤慮聞風蠢動浙為閩中門戶先事之謀唯在厚集兵力以為防守若不先上請臨事張皇顧彼失此雖任重咎無益於事又并請開試用火藥之禁蓋逆知閩藩之相繼叛逆預有以

防其變也至是聞亂即統標兵竝杭協兵自杭赴衢時撫臣以下謂會城為控制重地不宜移鎮公曰方今事勢所爭在衢倘上游失守不但全浙動搖江淮以南皆不安席矣遂裹糧倍道行抵衢駐節命副將王廷梅李承恩等禦仙霞關仙霞關者閩浙界扼要地也去江山縣百里關在嶺上級三百六十曲二十八長二十里雄踞眾山高插雲漢旁臨絕壑飛鳥莫度匹馬難旋與蜀之劍閣相埒賊眾鴟張豕突謀出仙霞公既遣將先據險隘斷其出路次防溫屬平陽處屬龍泉諸要地水路溫屬黃巖台屬象山甯屬定海暨杭紹嘉瀕海要地蓋耿逆構連海氛分道入寇公先調遣隣省兵捍衛之離海氛交以疑貳牽制之謀禦既定徐議戰攻公之戰于阡西也先大閱將士於水亭門宣布朝廷厚恩陳說順逆大義眾咸泣願決死戰遂同將軍賴塔薄賊營賊接戰久退入壁公率諸將進攻復大慶戰賊發礮擊轟聲震天鉛丸如雨及公馬腹左右請少避公曰三軍司命在吾少退即為賊乘今日之事有進無退吾不知有身矣麾眾進兵大敗之翼日復進逼公氣益奮士卒益用命陣斬賊帥斂器械無算是役也提兵不滿四千擊賊數萬眾無不一以當百屢戰屢勝賊鋒大挫匿不敢出自是溫台金嚴紹諸

戰皆捷或馘渠將或縛黨逆有投誠者推赤心待之難民流亡失所者安插撫慰全活之竊據地方漸次恢復而衢州大溪灘之捷尤得長驅破竹之勢前此公數請于朝添兵前進部議責公保守公奏耿逆勁卒畢聚於衢今欲搗賊巢穴必由衢一路此處殲其精銳奪其關隘諸路不難瓦解雖賊將深溝重壘現守河西然其南則江山西則常山皆可間道截其糧運并斷歸路我兵一進使賊首尾受敵便可相機撲勦以通入閩之路云云會大將軍和碩康親王奉旨進兵王問公曰賊勢張能必勝乎公曰必勝已見奏疏中矣王復遣人問所策果萬全乎公曰今大兵已發若復猶豫則士氣沮喪人心疑惑何以成功遂詣王曰賊寇情形久在目中明日捷音至矣已而羽書報聞王大喜曰岳忠武之策楊么不是過也時賊將馬九玉方逼衢爲壘我兵由南門銜枚疾走遶出其後破大溪灘此直取江山一師也賊敗奔仙霞復謀屯聚而三關盡爲我有進退無措此直取常山一師也公形之條奏者如畫沙聚米俱有成算故動輒有功冬十月自衢入閩獲賊將馬鵬鵬素梟黠聚眾於常王德興窺瞰江西閩浙形勢者磔之和碩康親王大兵進壓逆營耿精忠計窮勢極遁逃無路遂乞降檻送

京師公留師中且戰且撫靖海氛安隣境歷二載閩省始平方三藩謀逆吳逆橫滇尙逆梗粵耿逆又聲援相倚公以儒生韎韐臨戎阻遏衝擊批亢擣虛大小一百四十餘戰卒至殄殲大憝一切跳刀走戟之眾解甲離散化爲良民良由公之公誠仁智感格九重孚信將帥懽服芽蘖綏懷毗庶故能成大功於危迫之餘以紓天子南顧憂也公之功故在保全兩浙平定八閩而豫章江南藉以屏障且使吳尙二逆失所憑倚魄喪膽落相次翦屠則蕩平滇蜀交廣之功公實爲之先聲云歲壬戌奉詔班師公晉兵部尙書明年赴闕轉吏部尙書裁抑僥倖公正馭下諸吏奉行文書而已兩疏老病乞休上以有功未酬不許丁卯秋拜文華殿大學士充纂修大清會典一統志政治典訓總裁公病益劇明年子告回籍公既歸田杜門掃軌坐無雜賓唯架上理學書及經濟書數百卷晨夕繙閱如對故人常談討古今惟以天下善人君子得行其志爲快又朝中錄一正人必喜形于色曰天下蒼生福也身雖引退而倦倦於用人行政以奠

國家于久安長治類如此甲戌冬以疾薨于里第春秋七十有三是日
天鼓鳴大星隕識者謂公騎箕之驗云遺疏上

上遣官致祭

賜全葬立碑諡曰文襄報勳庸也歷四十年

世宗憲皇帝命立賢良祠祀

國朝名臣德之大者以文正湯公斌為冠功之大者以文襄公為冠即

成周記功宗作元祀意也有文集若干卷奏疏十卷行間紀略二卷軍

旅紀略四卷子鍾麟某官攀麟某官孫某某官鍾麟出守潮州時公

予手書曰唯公足以服人惟明足以祛弊唯廉足以養民惟敏足以集

事誠官箴也子孫世守之今李氏仕者並有聲於時

論曰人臣非有功之難而不居之難也宋澶淵之役契丹請盟寇

準頗自矜其功王欽若短之功名遂以不終文襄公自閩入朝無一言

及滅寇事有問之者曰

天子廟謨將帥用命吾何有焉緬其冲懷得諸葛忠武郭尚父之遺風

矣

君明臣良始終一德俎豆報功奕世不泯有以也哉

附錄十則

公為金華府推官總兵馬進寶即馬逢知駐金華性驕縱所部兵每抑

買民物民深以為患官吏緘口莫敢問惟公繩兵以法逢知泣訴道府

欲令地方官監買公拒以無此例但令其照市價無擾民乃得安迨後

逢知以不軌伏誅

程光祖

誤年譜

婺城當兵燹後土著流散市鮮寄塵即有舊家舍宇悉為隨征將卒占

住民多野棲露宿之歎公逐一清查將營弁大廈一十一所兵房一百

五十七所給歸原主民始得聚廬而居焉

巡道以獲盜大案委訊內有李四陳鸞等一案已論強劫坐十一大辟

矣公鞫而疑之謂屠法與吳成二家同日被盜居非連址且相距甚遠

李四陳鸞等既盜吳成何能又盜屠法審據屠法稱入門止覺二三賊

吳成亦供不過三人呼鄰追散因辨初招開列多人之非引強劫論死

之誤乃將李四陳鸞詳贓各杖餘犯竟行釋放

公升刑部主事將司理讞稿彙次為棘聽草自序曰凡所承斷一秉大

公使訥者盡言譁者獻詐反覆推勘務得其情而已即有不得甯為閉

閣勿為鋸筩又云念此三尺誠非武健自快之物鏡其情理以準于法

苛心恕心兩無所庸

上同

乙未

上諭各部院衙門有才優經濟堪任養民者咨送吏部從優擢用滿漢堂官僉議舉公公力辭或謂公曰優升他人求之不得君奚辭為公曰余歷俸尚淺未敢先人後堂官乃以他人易之且語公曰失此機會勿後悔公曰若有後日之悔則無今日之言

上同

庚子代巡山西接部所歷延見士民訪問疾苦以圖實政貪墨解綬勢豪屏息辛丑停止巡方公於文到日即將行過案牘槩送撫院掾吏白公須一加檢點公曰凡我所行無不可與人知何檢點為麾使去遂單車就道不移晷

上同

乙卯軍中獲敵營閒諜公漫詰之曰吾營中亦有爾營與相通者乎對曰有之間為誰乃言姓劉者不知其名公默意姓劉者必某也呼至訊之果供有提塘鄭君能現在隨營凡朝報緩急軍情機密皆漏洩與賊因立質得實置君能于法敵聞遂絕

上同

有交遊謂公宜為子孫田舍計公曰受

上同

國厚恩即捐糜踵頂猶恐難報何暇念及子孫哉或又謂封疆大吏當

地方有事之日一介不取乃是小節公曰此豈小節總督為一省吏治

民生攸關敢不自律以正

上同

公為定亂記曰將軍嘗與余商進取之策余曰賊毒流于眾餉匱於中又內難交訌其勢自潰為今日計者不難制勝于未取之先而難得心于既取之後假使大軍既入玉石不分肆其誅掠是益之虐也安責其背義以助叛乎兵貴威之以武威之以仁況禁掠則民喜離湯火而攜箠以迎縱掠則民欲保妻女而堅壁以守得失之驗瞭如也是宜于平日曉諭將士則臨時自無屠掠之慘而淪陷之區皆可乘勢而復矣將軍曰善余以是告誠鎮將亦莫不頰首奉命

上同

公長子鍾麟升廣東潮州知府公手書示曰漢宣帝曰與我共治天下惟良二千石今之知府即漢之二千石也良字最宜體認并手書惟公足以服人惟明足以祛弊惟廉足以養民惟敏足以集事四語俾長君懸之座右

上同

謹案原編有嚴飭諱盜累民疏請禁雜流委署疏覺察奸蠹內外

誥授光祿大夫勇畧將軍總督雲貴兵部尚書兼都察院右副都御史

世襲一等精奇尼哈番謚襄忠趙公良棟墓誌銘

張玉書

康熙三十六年三月四日光祿大夫勇畧將軍趙公以疾薨于甯夏里第時

車駕方西征聞奏震悼比從橫城口濟河下

論內閣部院諸臣勇畧將軍趙良棟為國家宣力奮庸厥功甚茂倏以

疾逝朕深憫焉茲師抵朔方道經其門欲令皇子臨視奠醑可集議以

聞於是臣王書偕諸臣言皇子親臨臣下之喪曠代希有將軍臣良棟

膺茲異數豈獨一家之私榮凡百臣工無不感激隕涕明日次甯夏

皇子臨喪舉哀賜奠如禮閏月復頒諭祭文遣大臣致祭其子道臣宏燮中書臣宏煜先後詣

行在謝恩

上皆召見撫慰之又數月允禮臣請以例子祭葬

賜謚襄忠嗣總戎宏燦歸自黃巖乃卜冬十二月日葬公于城西二十

里某原而乞銘墓石於余余辱交公久素悉公歷官制軍忠勇大節與

其生平慷慨質直強毅不撓之氣嘗私竊歎羨以為古名將所不及而

聖天子推心置腹眷倚之重以及自始迄終恩禮之隆尤足以獎勵功

勳為勞臣白首效忠者之勸余雖不敏敢不據所見聞摭拾其梗概而

敘次之公字擎之號西華先世自陝西綏德衛遷居安邊逮公官甯夏

因家焉故今為甯夏鎮人曾祖某祖某父某官海州參將皆贈如公官

曾祖妣某氏祖妣某氏妣某氏皆贈一品夫人公少工舉子業願倜儻

有大志不屑束縛章句遂仗策從戎順治二年隨和碩英親王師入關

中受知于制府孟公喬芳署潼關守備從征賀珍武大定等賊又從定

甯夏叛兵之變因署其地屯田水利都司四年領兵平河西徇亂又單

騎擒肅州偽總兵丁國棟擢補高臺遊擊十三年王師入滇以雲貴督

標副將從征隴納諸苗康熙元年積功授都督僉事充雲南廣羅總兵

官是時吳三桂專制滇南所補用官吏

詔部臣不得掣肘於是三桂調公貴州比喇鎮令進剿水西公方丁外

艱力辭不許四年水西平乃聽終制三桂中藏叵測以牢籠人才為務

惟公先幾之哲不為所用云八年補大同左都督十一年調天津明年

冬滇逆變作四方叛賊蠡起甯夏亂兵劫殺其主帥勢甚猖獗十五年

春特命公提督甯夏馳傳往鎮撫之公見

上詞氣激慷請移家口居京師得一意辦賊
上壯其言隨

命賜第公至鎮集將佐宣布德意捕斬首亂四人餘不問邊境遂安公
駐朔方四載念關中粗定而漢南巴蜀猶阻聲教自請率步卒五千獨
當一路進取漢興恢復蜀地

詔下軍前諸大臣集議僉言大軍宜分興安棧道入堵山小川子四路
並進需兵五萬人公曰兵貴精不貴多也自將五千人指入堵山徑入
十月破密樹關取徽州復畧陽分遣裨將趨陽平關覘賊虛實仍條上
調兵運餉事宜請兩路收川
報可特授公勇畧將軍十九年正月朔公師臨白水壩與賊夾江而陣
江流湍湧無舟楫將士有難色公怒誓于軍曰視我馬策所指敢後者
斬環甲躍馬浮江而渡一軍皆渡賊駭愕奔潰追擊之于青山石碛溝
歷舊州明月江屢戰屢捷甫十日遂抵成都先鋒奪門入公下令毋剽
掠整軍登陴市肆晏如在城偽官及逆兵數千人疑懼不自安公悉以
迎降奏釋眾皆感悅越數日奮威將軍王公進寶亦報保甯之捷東西
川以次收復事聞

天子降溫旨勞軍以

御書題額及弓矢橐韃名馬之屬先後頒賜甚渥是時湖南粵西方併
力進師規取雲南

上念巖疆綏靖制府需人非得謀勇素著操履潔清兼資文武大畧者
不克勝任遂授公兵部尚書兼都察院右副都御史總督雲貴將軍如
故而以公之子宏燦為甯夏總兵官隨軍進勦自收蜀以後苞蘖尚繁
公經營一載反側者始定二十年三月追勦逆渠胡國柱於觀音巖十
丈孔五月破關山象嶺渡瀘江七月復取建昌乘勝渡金沙江九月乃
入滇時楚粵之兵已圍滇省城數月願持久不能拔公周視壁壘謂結
營遠賊得番息法當移軍逼之選入川精銳五千親冒矢石取玉皇
閣進逼新橋賊方據橋扼守後以計從上流濟師晝夜力攻凡八日而
城下逆賊踞滇日久私斂充物一時諸將雲集多志在攘掠惟公率所
部卒勿以一騎入城既奏凱即懇請

陛見移師曲靖以待

命嗣後贖貨者纍纍致敗而公獨嶢然無滓其遠識確守卓然有古大
臣風烈焉公於時己年踰六十

上念公久勞於外特允入朝二十一年冬授鑾儀衛使踰年請疾歸里
二十七年以國恤會葬詣闕下三十年厄魯特噶爾丹蠢動邊塞大軍
駐朔方

詔公以在籍老臣預議軍事三十三年禁旅出塞公偕行指畫地勢兼
以私財佐軍既還復

詔入朝明年追論前功特加一等精奇尼哈番世襲是年秋就醫江南
賜御舟給驛三十五年復

召入朝時
上決策統師北征諮邊事甚悉公因疾不果從比及師旋遂

賜歸明年西征
上方欲就詢公于里第而公竟不及待嗚呼是可悲也公結髮事戎行

五十餘年大小戰數百未嘗敗衄御下嚴而有恩觸法者雖小必罰有
才畧堪任者抗疏引薦常自偏裨積至大帥軍中甘苦與其一飲食不

以自私入蜀之役裹糧涉險轉戰七十餘里而士卒咸樂爲盡死無一
怨言其能結士心如此故所向有功性抗直同事多不相下功成以後

慕問者日眾惟

上知公深嘗格眾議曲賜維護自蕩平三逆以來閱十五年矣復屢
詔旨鋪陳本末於平蜀嘉倡進之謀於克滇獎廉潔之操于是公之勞
績久而益明而其行履卓犖無疵亦得皎然備著于

國史是公之得全其身與得全其名皆
上恩也百世而下聞之猶爲感奮太息而況於公平而況公之子若孫

乎是用備書以示來裔公生於明天啟元年十月距薨得年七十有七
配郭氏繼配李氏白氏贈封俱一品夫人子五人長宏燦以左都督充

浙江黃巖等處總兵官次宏燦御史宏煜內閣中書宏煒宏燿尙幼女
三人長適庚子舉人強振猷次適侯推副將郁起雋次適一等侯江南

提督張雲翼孫六人公治家如治軍閨門嚴肅儼若公府諸子屏息侍
立無敢有跛倚之容以是總戎憲副所至有政聲中書亦明敏練達皆

仰荷
宸眷云銘曰

天翊景運篤生人傑桓桓趙公威武惟烈早歲仗策從王子征手執螯
弧目無堅城爰制中權爰總戎律嚴明有威卒伍整密三秦叛亂將驕
卒狂風馳颺驅迅掃欃槍巴蜀如焚滇黔如悞獨提孤軍鼓行而南銜

枚宵濟莫敢齟齬直入蜀郭前歌後舞蠶叢既定揚旌渡瀘環城三匝
拉朽摧枯賊首朝投降旂夜豎氛裊盪滌復我疆土凡此大功
帝曰爾庸事紀簡冊銘勒鼎鐘大官授膳尙衣賜服彤弓盧矢驕驪
駮公之來朝

天子燕喜公之既歸

天子拊髀國有大事爰詢爰謀公徐一言等于圖球公之材武如鷲如
虎公之智畧如風如雨公之精誠如火弗滅公之勁直如鐵靡折恃其
孤忠以報

一人白首不挫厥聲斷斷惟

天子明獎乃勳勞生有殊恩歿有厚褒以勞定國以死勤事

主聖臣忠近古莫二歷觀載籍如公不朽納銘幽宮垂示永久

又特進光祿大夫兵部尙書兼都察院右副都御史勇畧將軍趙公神

道碑銘

嚴虞惇代某撰

康熙三十六年三月特進光祿大夫勇畧將軍趙公以疾薨於甯夏之
里第時

天子西巡朔方聞訃震悼特命

皇長子親臨其喪

諭扈從諸大臣赴弔閏三月六日

御製祭文遣大學士張某賜祭如禮其孤子宏燦宏煜等先後赴

行在所謝恩

上復召見慰撫所以褒崇寵錫之甚厚於是宏燦等撰事狀以隧道之
石請銘於余先是十五年春公以甯夏提督奉

命朝京師余時官翰林始識公之為人後公凡四入朝余待罪政府與

公相周旋悉知公忠勇大節歷官制軍勝敵之畧與其生平慷慨質直

強毅不撓之氣未嘗不景仰歎慕以爲古之名將所不及而

聖天子褒崇寵錫推心置腹眷注之重與夫自初及終卹賚之隆尤足

以獎勵勞臣爲國家宣力效忠者之勸故於燦等之請輒條次其梗概

不敢以不文辭按狀公諱良棟字西華先世自陝西綏德衛

遷居安邊及公官甯夏因家焉故今爲甯夏人公少儻有大志讀書

不事章句好觀古人忠孝節俠事嘗慨然曰大丈夫當爲國家出死力

定禍亂安用儒生咕嗶爲遂以順治二年從英王入關受知于制軍孟

公喬芳署潼關守備時賀珍武大定等構亂秦鞏從都督劉芳名討平

之及從定甯夏甯夏屯田水利都司四年帥師征河西克之單騎縛
偽總兵丁國棟以功補高臺遊擊十三年經畧洪公承疇薦授雲貴制
府中權從征隴納水西諸苗猓山谷峻險糧運不給諸軍多失律公獨
號令嚴整所向克捷所得俘獲悉頒諸麾下無私留者積功陞雲南廣
羅鎮總兵官

今上御極之元年也鎮府初設軍旅草創公振肅綱紀仁威並行伐叛
柔服動合機要故能建威消萌烽火不警吳三桂尙制滇南調公爲貴
州總兵官勒令進攻水西時公已丁外艱力辭不允墨纒卽戎水西平
乃聽終制再丁內艱服除八年補大同總兵官加左都督考核軍政嚴
而不私積弊爲之盡革十一年調天津總兵官天津素稱盜藪旗丁鹽
販通行囊橐白晝大都攫人而奪之金吏莫敢訶問公至則申法制立
程約張設耳目窮治根柢務在鋤強暴以惠孤弱於是奸宄屏跡部告
無事十五年奉

旨以提督撫安甯夏入朝陛辭當是時三逆煽亂遠近響應甯夏叛兵
叛殺主帥勢益猖獗公見
上詞語慷慨忠義激發請以家口移居京師使得專意擊賊

上爲之動容

特賜第宅銀米貂裘鞍馬弓矢之屬公卽日就道直抵延綏西路之定
邊謀報賊兵由甜水河來劫餉左右請少卻公叱之晨夜兼趨搶入橫
城賊不意公卒至遂宵遁公厲兵秣馬修器械屯餼糧訓練士卒以勇
以義購倡亂者熊虎劉得閻國賢陳國忠四人請

旨正法軍中肅然無敢譁者在任三載威信大行關中已畧定矣公念
漢南巴蜀未入版圖天兵稽誅民罹湯火十八年上言臣願以所部練
卒五千獨當一面規取漢興恢復川蜀

上下公卿議者謂由興安棧道入堵山小川子四路前進須滿漢兵
五萬人前後接應輜重不與公曰兵貴精不貴多也遂率甯夏本操漢

兵五千自齎行糧由八堵山路徑進遂破密樹關取徽州復略陽分遣
裨將急趨陽平關覘賊虛實十九年正月兵至白水壩與賊夾江而陣

江水暴漲波濤沸天岸無舟楫賊矢石如雨將士皆懼公誓於軍曰此
臣子報國之日也視我鞭所向敢退者斬於是一軍皆奮呼聲震山谷

遂擐甲浮江而渡江流爲平賊錯愕奔潰師乘勝逐北過青川大敗之
於石夾溝再過青菁山舊州明月江屢捷勢如風雨不十日而抵成都

先鋒奪門無有阻者遂入城城中人不虞我兵之從天而降也先是

上以公老於兵事詔問公收川事宜公條奏兵調發若何糧輸輓若何勦撫大勢若何經畫詳明言極剴切

上是公

詔悉從公議是役也兵雖兩道入而諸將方畧悉公所預定公既入城即下令禁剽掠布價不變男女不聳赦脅從撫降附開誠示公宣布威德於是東西川及天全諸土司烏斯番族等皆傾心向化民樂更生焉

捷聞授公勇畧將軍仍管甯夏提督事會雲貴總督缺人

上曰趙某謀勇茂著操守清廉雖係武員通曉文義其改爲總督遂以勇畧將軍授兵部尚書兼都察院右副都御史總督雲南貴州等處地方兼理糧餉時雲貴尙阻兵也公在蜀聞

命以年老疏辭不許即自蜀入滇二十年三月追勦胡國柱於觀音崖五月破關山象嶺渡瀘江七月復建昌九月抵雲南時湖廣廣西兵已圍城數月矣公閱視壁壘謂營陣太遠賊得休息故久而不下恐師老糧匱法當移營以逼之乃自帥五千人急攻親冒矢石諸將益用命凡

八日城下蓋公爲將善料敵識地勢勇氣感發不避險難其教士悉用紀律信賞必罰臨陣對敵勸以大義故士卒皆樂爲之盡死所向有功平滇平蜀皆以此也是時公年已六十餘矣海宇蕩平橐弓歸馬

天子念公久勞於外特准入朝

命掌鑾儀衛鑾儀使事優老臣褒舊勲也公結髮從戎四十餘年大小之戰數十百功勞奏最莫與爲比

明主深知其忠特加一等精奇尼哈番每寵以殊禮其方定蜀也

御書存誠匾額秋興賦

命公子宏燦馳至軍前賜之其既定蜀也

命宏燦再至軍齋賜弓一張馬六匹及宏燦以甯夏總兵陞辭也復賜

公

御製詩太極圖說刀一撒袋一其平滇而歸也遣使郊勞賜茶其掌鑾

儀衛也時天寒賜懸狐裘懸狐帽各一其奉召入見也

天子停驂勞問呼將軍而不名其就醫江南也

命昇至觀德殿

聖躬親視憫惻者久之念其疾也則撤尙方珍物人參鹿尾以賜之念

其老也則擇內城寬大第宅以處之或手書存問或晝日三接大官賜食便殿命坐隆恩殊錫近古未有有大事必就公諮訪或召至京與諸大臣錯議必待公而決而公亦殫心盡瘁不為依違在上前知無不言無所隱避三十年師征噶爾丹

命公巡行塞外公相度地形施設營陣日以私財椎牛饗士馳驅沙漠據鞍顧盼英風銳氣老而不衰

大駕親征公又扶病入朝口陳兵事侃侃諤諤皆可見諸施行

上方深倚毗之而公以不起聞矣公學問通達才思警敏每奏兵事皆躬自操牘不假手於幕客曰軍國大事非他人可代也日教子弟以忠

義曰君恩深厚汝曹宜盡力居喪哀毀骨立若不能勝者治家嚴而有法門無雜賓蓋其內行醇備又如此公生於明天啟元年十月卒於康

熙三十六年三月年七十有七娶郭氏封一品夫人繼娶李氏贈一品

夫人再娶白氏子五人宏燦左都督管浙江黃巖等處總兵官宏燮山

東按察司副使管天津道事宏煜內閣中書舍人宏煒宏熿尚幼女三

人孫六人銘曰

天翊聖運篤生人傑桓桓趙公威武惟烈早歲杖策從王於征舉旗奪

蝥目無堅城爰制中權爰總戎律嚴明有威卒伍齊密畿輔之地奸宄是區挈持維綱以鋤以誅關中叛渙將驕卒狂風馳颺驅迅掃欃槍巴

蜀梗化滇黔阻兵

主憂臣勞抗章請纓遂率所部練卒五千鼓行而南搗其中堅腹敗支

披莫敢齟齬整旅入郛前歌後舞市不易肆農不輟耕鳥言卉裳壺漿

來迎蠶叢既定揚旌渡瀘環城三匝拉朽摧枯賊首朝投降幡夜豎氛

禩盪滌復我疆土凡此大功

帝曰爾庸告於文人勒鬯銘鐘大官授饔尚衣賜服彤弓盧矢驂騶驪

駮公之在朝

天子是毗公之既歸

天子用思國有大事爰詢爰謀公徐一言奉為圖球公之材武如熊如

虎公之智畧如風如雨公之精誠如火不滅公之亢直如鐵不折恃其

孤忠以報

一人至老不悔厥聲斷斷惟

天子明獎其勳勞生有殊恩死有厚褒以勞定國以死勤事臣忠

主聖古莫與二厯觀載策此為不朽我作銘詩垂示永久

誥授光祿大夫少傅兼太子太傅昭武將軍提督江南總兵官三等阿

達哈哈番諡敏壯楊公捷墓誌銘

張玉書

昭武將軍少保兼太子太保提督江南楊公以康熙二十九年十月甲申卒于位年七十有四訃聞

天子震悼命所司議卹議諡既上

詔加贈少傅兼太子太傅易名敏壯祭葬如制而碑版之文

特命翰林院掌院事桐城張公撰進榮恩備禮踰于常格何其渥也惟

公自束髮承祖父之烈從軍旅當

世祖章皇帝入關定鼎公年未三十卽以武畧知名於時歷官四十餘

年身經數十戰所向輒克比爲大帥而威望益重以功名終非才與福

并不克有此嗚呼豈偶然之故哉楊之先世居揚州之寶應縣崇儉鄉

勝國時有以軍功授後屯衛指揮使者遂爲義州人公諱捷字元凱曾

祖諱子隆祖諱應元皆襲世職父諱國棟以軍功歷陞義州城守參將

加副總兵母趙氏義州圍急自經死曾祖以下皆贈少保如公官妣皆

贈夫人而公之叔父國楨國柱兄振並用邊將立功國柱振又先後死

事稱名臣此公之世次也明末公依洪文襄爲偏將國初以材勇擢山

西撫標遊擊歷宣大督標中軍副將九江總兵官加右都督以平嶺南

功進左都督提督江西加太子少保調山東江南福建加少保兼太子

太保昭武將軍授三等阿達哈哈番復調江南此公之官秩也方順治

五年春公以副將統精銳赴粵會金聲桓叛兩江騷動公留軍討逆與

固山額真譚公泰會師恢復彭澤湖口九江南康諸郡諸大帥見公驍

勇大奇之遂題鎮九江明年逆賊授首江西平至十年秋復統九江鎮

兵入粵克潮州十一年冬征閩駐師漳浦其城爲賊毀修築之十六年

春奉

命提督江西是夏海寇犯江甯

詔公同江南左路兵相機撲勦事平仍駐瓜州轄廬鳳淮揚諸汛康熙

元年正月移節山東會于七溝亂登萊幾不守公偕禁旅按賊黨又以

登沂二鎮分轄諸路兵畫地戍防羣盜始戢駐東省凡十二年

詔移江南甫受事而三逆變作浙溫台陷勢張甚有議設蒙古兵于松

江者公不可曰閩越易與耳不日卽成擒矣至十六年間逆已殄而海

氛助虐者尙熾

特命公入閩提督水陸軍務公至簡閱士卒疾救漳泉屬邑之被賊者

察諸鎮中惟黃福甯大來敢戰可任乃親帥鎮兵會禁旅合攻惠安拔其城賊踞洛陽橋北斷橋以拒官軍公陰遣奇兵襲毀賊營出橋南賊腹背受敵遂潰泉州圍解而水師鎮協又先奉公密令于外洋牽賊勢至是犁沉賊舟殲勦甚眾漳州賊請撫眾議持兩端公登赤嶺望賊壘整暇謂此款我師也決計進軍皆敗走公以水陸勢難兼顧屢疏辭水師至十八年始拜昭武將軍

命專提陸師勦逆十九年賊屯漸山立十九寨公以計建七營擊破之遂復海澄自是偽將接踵歸附即遣為鄉導用三路攻克廈門雖臺灣未下而賊豎已胆落不復支矣公在行間兩載觸冒瘴霧抗疏乞身而廟堂深悉閩地蒸濕與公病非宜已先有還鎮江表之命公既至雲間念舟山猶被賊踞為江浙隱憂咨制府于清端公同浙兵會擣賊巢畧定其地於是設鎮置縣弛海禁焉公之遠謀制勝多在籌海而閩海既清則吳越千餘里帖然無復烽燧之警故公之功平閩為尤烈也歲當甲子

天子修時巡之典自岱宗達於江淮公迎駕淮北恩禮殊異越五載

乘輿再狩公迎覲如初而慰勞之殷賚予之盛視昔有加時余亦忝扈從嘗與公並騎行竊覩公顧盼矍鑠冠劍甚偉及沿江而下公獨乘小艇攜兩健卒晏坐于驚風白浪之中一時豐鎬舊勳咸指目歎羨余因舉昔人詩所云精神如破貝州時者謂公庶幾似之乃甫閱一載而公遽逝是可哀也已公之既疾革也召諸孫侍側口授遺疏惓惓以修海塘築寶山城復海邊沙船及派支軍食為言蓋公所至之地有利必興有弊必革兵民無歧視而尤務施德澤于民易簣之頃志存體國語不及私以視古大臣之用心甯有媿哉公內行涓備撫孤嫠振貧困事至周悉載余前撰柏夫人誌中茲不備書夫人塔山參將諱永培女公元配也累封一品夫人子三人皆以廕起家懋緒陝西布政使司參議分守潼關道次懋紹雲南武定府知府柏夫人出次懋綸河南按察司僉事分巡大名道先公兩月卒側室黃出娶皆右族孫六人長鑄次文鐸俱國學生次錡次文孫懋紹出次鉞國學生次鎮俱懋綸出孫女七人曾孫女二人懋緒懋紹將奉公喪以康熙三十一年九月辛巳葬六合縣某山之麓以余知公深屬為誌特纂公行事之大者而敘錄之如此銘曰

穆如其容大河喬嶽淵然其器金鎔玉琢手提鵲印口畫軍機若觴解
結如犀燭微繁若東南天戈所指江南百粵觀公遺壘閩嶠焰虐長鯨
鬚張聿翦羣醜用綏海疆迄還舊履作屏江表貌貅桓桓虎臣矯矯
南巡迎謁

帝親勞軍蕃錫燕飲式渥且殷吁嗟老成允倚坐鎮將星儻隕

殊恩弗靳

天章崇獎

賜塋歸然貽厥孫子世澤永綿

蔡新

又重修漳浦懷德書院碑記

漳浦北關內有懷德書院者自順治之十三年祀故昭武將軍提督楊
公者也當是時鄭逆猖獗海氛方熾公來鎮茲土修城郭禦寇敵綏眾
靖民厥功甚鉅士民感公之德遂構祠而肖公像以祀之始名楊公祠
後公提師入漳行部過浦士民喜公之再臨也又重新之更今名百年
於茲矣歷時既久漸就傾頽今年春邑侯徐君尙忠謀葺治之民樂趨
事不逾時而廟貌煥然適余請急歸省而勾余誌之余惟公之勳績在
國史德澤治民心固無俟于余文而余文亦豈足以重公者雖然吾浦

人甘棠之遺愛也其何敢辭公諱捷字元凱先世隸籍維揚遠祖於勝
國時仕遼因家焉遂世爲義州人其祖父伯叔皆以門閥技勇起家一
時家聲藉甚公年十六卽能挽強命中結納英豪不事家人產維時內
外交訖制院洪文襄公循地望擢爲偏裨我

世祖皇帝入關翦逆定鼎以材勇異等除授山西撫標中軍遊擊繼任

宣大副將援剿兩廣遂擢九江總戎恢復江西郡縣會師廣東恢復潮

城隨征福建江南提督山東凡歷數省皆有勦禦寇賊底定邊疆之功

是公之勞績半天下非特一邑一郡之爲烈也而我浦人願獨有私於

公者則何以故蓋公兩次入漳在前甲午之冬以左都督充福建右路

總兵官仗鉞以前戰無不克遂底漳浦海逆雖皆奔竄而郡邑名城率

多拆毀無險可恃狂狡不難乘機豕突公至卽相舊址計工程課徵楨

幹具板築匝月之間垣墉雉堞言屹屹爲他邑先浦人賴之若防之

制水恃以無恐是公之大有造於浦也粵康熙戊午海逆復煽據廈爲

巢繼掠漳泉屬邑所至不守斯時也浦民望公若望歲焉日夜以幾公

復奉

命督師入閩時制院姚公在漳羽書接踵請援公相緩急機宜以爲非

先安泉而即援漳將有腹背受敵之虞故既復惠安解泉圍而後疾驅至漳與姚公商破敵策是冬即會兵克復江東橋萬松關己未春賊踞險立巢以防我公絕其掠食要道勢窮益猖獗公帥師逆擊之遂潰又遣將焚毀其舟生擒偽將賊勢益蹙庚申二月賊分據扼要立十九寨以拒我師復聯絡重地以壯聲援公用計出奇破其所恃令首尾牽制難以四應乃會師攻復海澄賊遂大窘隨乘勝飛咨督撫鎮將訂期三路進攻廈門擊破賊艘敵淹死無算數十年逋寇逆窟一朝頓清是公之大造於漳即更有造於浦者也此浦人之所以沒世不忘也聞逆既平

天子以公年老有疾仍調還提督江南以便調攝公在江南前後十五年尤多異績不具詳公少際亂離書知姓名未能竟讀而用兵暗合孫吳生平馭兵威而有惠于民瘼尤如體卹所以士樂用命而所至謳思自公去後

國家承平無事文教誕敷公子孫繼繼承承敷歷中外而皆以文事世其家今年夏公會孫景素適來觀察是邦因巡屬邑至浦瞻拜祠下徘徊久之喜浦人之不忘舊勳而能念公之德於不衰也浦民亦焚香載

道樂公之有後將世修其德而重有造於吾浦也是又觀察君與我民

維繫無窮之心也夫因并記之

請逆將軍甘肅提督一等侯諡襄壯張公勇傳 陝西通志

張勇字非熊洋縣人初隸陝督孟喬芳以標兵勦賊南北山間有功順

治五年從喬芳征臨鞏所向皆捷繼克甘肅河西底定授甘肅總兵十

一年調隸經畧洪承疇滇黔平提督雲南康熙二年朝議謂玉門鎖鑰

非勇不可復調甘肅諸番以大草灘豐水草覬為牧地

遣廷臣至邊議可否勇執不可事遂沮又設永固協築八堡防守益嚴

十二年吳逆倡亂延及臨蘭勇遣將復臨洮而自率兵圍蘭州晉靖逆

將軍尋為侯復

諭兵部秦省重地軍務方殷張勇忠勤懋著謀畧優長凡用兵籌餉一

切機務聽便宜從事勇聞

命益奮留西甯鎮兵圍蘭州而自率兵圍鞏昌取漳甯諸縣以絕其援

又檄土官楊朝梁兵使勦潘瑀取洮州遂圍岷州久之鞏昌未下勇計

賊勢窮必開門突走預設伏待之賊果出斬獲殆盡餘就撫蘭州亦降

會盜殺甯夏提督陳福邊人洵洵勇率兵赴之至中衛聞蜀賊出秦州

乃飛檄定甯夏而急回兵駐伏羌時西河通渭諸處皆沒於賊勇以麾下數百騎與賊相持者三閱月大軍既集賊始遁自是掃平涼下漢中蕩平之效基於此矣十六年加授少傅兼太子太傅進太子太師一等侯世襲二十年以衰病再疏辭任不允明年疏請入覲

宴賜有加還鎮踰年卒

賜祭葬贈少師諡襄壯雍正十年入祀賢良祠子雲翼嗣侯提督江南

全省軍務

光祿大夫賜一品葬陵鎮總兵官胡公世英傳

錢維城

胡公諱世英字汝迪江南歙縣人世有隱德父宗信生二子公其次也生而狀貌奇偉日光如電落落無嗜好獨喜讀書明萬曆天啟之間海內大亂流賊徧天下歎曰民苦盜賊久大丈夫當莫安之安用矻矻效經生事於是窮韜畧攷古今興亡得失之故與天下形勢險阻扼塞挾策遊四方無所遇崇禎初避亂江右以親老不欲用于時既終喪還葬于歙及我

國家既定天下率勇士數十人見福建總督李公率泰于軍門李公一見奇之從入閩所向有功累擢至參將康熙元年徙湖廣總督中軍時

李來亨方據西山自鄭陽至夔州千餘里皆賊巢荆襄歲苦剽掠公奉檄隨提督某往征之至輒深入三戰破九女山奪其土城營之師進路益危阻澗不得上乃與提督分屯要害為持久計賊合五營襲提督軍軍潰偏裨皆沒失印歸者二十九人賊乘勢衝公軍公斬賊數十騎聞大軍潰乃退守土城賊攻益急明日突圍出收其散卒以行提督至當

陽以潰聞

上乃益發禁兵佐之復進攻與賊對山而陣緣崖攀藤頂踵相接比達賊壘礮石發則撤振自傾壓軍士患之公獨率敢死士奪隘而上死者過半乘間遂深入與賊夜戰鬱孤臺大破之左右皆降來亨自焚死初土城之難公突圍而出與軍士失賊眾追且近公勒馬叱賊賊輒止走復追之如是者三入隘口土垣當其前公以刀割所乘馬祝之曰吾他日能滅賊者過此馬忽躍起丈餘踰垣斃徒步走河下積屍藉藉躡而渡宿漢關神武廟夢神謂己曰吾使河神衛汝矣當復過此也至是獲賊將訊之曰爾曹昔追吾吾勒馬爾曹何故止皆曰將軍馬後四長人從行將軍止四人亦止則懼不敢前公知向者為河神之助也祭于廟而歸四年禁軍復命陳前喪師始末逮提督以下并公入勘士民聞之

咸哭奔走塞城市爭饋酒食比入都提督諸人皆坐削獨公以前後功
無恙七年調守均房先是布政使給軍餉每逾期或半給以爲常軍中
多苦飢時又議裁督標兵故軍士夜譁公捕其魁眾寢定司使者乞救
于公公曰禍基吝餉昔請多不應然事至此吾獨代其咎甯委罪使君
議上

留中者久之復職如故均州爲武當之會舊有渡船宮觀諸羨悉謝不
受禁軍卒無與市利郡多虎災羣虎遊于郭公祭于神輒止士民異之
爲歌其事十二年冬擢副總兵守階州會吳三桂反滇南郡邑多陷漸
及楚荊州民紛紛竄山谷當事者鑰城門禁之益亂夜四五驚總督蔡
公毓榮以中軍不能支檄公代公以甲寅正月至受印告蔡公曰吳逆
之叛祇雲貴耳酣豢垂老腸脾脆薄焉能持久自始反至今四十餘日
不出此驚馬戀棧豆不足畏也驛報紛訛徒亂人意且靜勿擾民心亂
則士氣奪請先開城禁世英且迎家屬入城矣又曰舉事必萬全度吳
逆必觀望閩廣之釁而中出以乘其利吾先宿兵于江之左右塞浙東
西路調河南鎮軍爲助按兵俟禁旅加兵糧汰老弱獎壯勇令提督馳
常德以固門戶彝陵居荊州上游實襄鄧屏蔽亟加將增戍以杜旁衝

擢良將鎮長沙以壯廣西之氣此六者請卽施行餘世英悉任之蔡公
從焉有婦人爲男子服出城者獲之公召四門父老引之去謂曰爾屬
聞賊旦暮至乃亡命出城耳何用譎詭爲若不見去冬逃湖中者多以
風浪死卽不死流離無所歸今大軍十萬且至爾屬居城中無恐吾家
屬不日到吾且開城恣爾出入逾月家屬果至民驚喜相續入城二月
提督率南陽卒五千人至時常德將以城叛公議曰若退師則湖南去
矣當速止之選才二千騎三百渡江擇壯士三人授以計潛入常德營
夜半縱火砲發賊驚潰叛將自殺人奪一偽幟來軍大振十四年言者
以師老糜餉趣進兵於時多羅順承郡王率師公以本隊四百人前濟
稱先鋒軍于太平街告蔡公曰兵貴乘時此來出不意賊援未至急攻
城可拔也常德卽破岳州以上皆定矣蔡公曰侯王至請命對曰賊三
日不出戰內虛也過此援且至太敵在前見可而進胡請命爲明且營
士而進凡二日立砲矢下砲過右腋箭矢裂衣紐盡失後卒斃焉公神
色不動督戰益急郡王至軍畢集遂合圍賊勢困伏壕以守會賊援至
衝我軍爲二公揮左右張兩翼而上賊敗軍復合或曰賊援銳姑避之
公曰賊遠來勢未定法宜急攻今三面爲賊一面爲水我陣一動求船

不得賊且掩至非利也若必欲爲退計則請令士卒直前如戰狀立幟而夜渡王軍先濟諸軍次之世英勒眾以當其衝可耳王大悅公乃拔營修塹壘布鹿角砲石分左右翼略陣旋哨多張燈火旗幟左出右入度師已畢濟乃分騎隊逆城十里而陣人持二炬賊驚不敢出夜半乃棄營壘登舟徐徐而行賊兵追之入營火發地砲皆作賊死傷無算十六年常澧諸郡飢米大貴賊將吳應騏令各邑折價免運又自糶其倉糧以爲利公聞之曰是天奪其魄也遂獻策曰賊所恃者糧耳今歲不登而自空其儲吾密令人盡買之而亟馳重兵截其上流糧道賊必飢窘因以大軍駐君山湖口諸汶不時撓之長沙自顧不暇秋冬間縱不拔岳州必可得也從之于是水陸並進公居前鋒擢小舟直抵巴陵溯風而戰偪岸且近公呼而登曰得陳陵磯矣軍士皆登磯寨悉平則入湖碎賊巨艦二獲大小戰船三分兵搜湖近湖諸賊賊糧絕十八年正月應騏夜遁民迎入城公曰賊遁雖內怯且防其薆勿遽入賊室乃令毀垣入則溝通四圍皆穿竹藏火入堂則皆伏砲于機眾咸稱服二月師歸自岳州是年正月郡王奏荊州設隨征四鎮公以副將授後路總兵官至是奏四鎮功績有差

上命公以總兵官守荊州四月

上以蜀楚要害難其人乃移鎮彝陵公遂奏取夔州重慶機宜請自率

步騎乘便而進留郡王駐荊貝勒駐彝陵爲犄角之勢

上可其奏先是彝陵鎮升提軍盡率鎮兵爲提標舩艨艟百無一存

者公乃請調各郡汰兵冗員訓練之造戰船修器械晝夜並作提督徐

公治都亦奏同征公曰蜀山雖峻險緩急可自由水戰舟行石罅漩窩

中進退難此行吾實倡之願爲其難者徐公拱手曰服公度久矣遂禡

師子德龍德麟從次於西壤去賊壘夾門灘百二十里縉舟者蟻緣峭

壁間江石齒立激流衝其上舟非風順不得過徐公至曰兵貴神速水

路艱且遲賊以吾糧未至守必疎乘此拔險何如公曰賊久知吾軍至

豈不伏精銳以守宜結營俟糧緩以伺之十九年正月與撫軍楊公茂

勳會于西壤議破敵之策公曰賊恃天險守三峽爲持牢計且以吾糧

運難久駐于此陸防必懈請徐公立幟北山示不疑而暗趨南谷吾先

以水師挫其鋒巫峽得陸防必走則乘勢亟進不然春水漲水陸皆阻

嵐瘴侵人矣楊公大悅公出戒軍士佯曰且休三軍夜半令德龍曰魚

腹河稍平可泊彼必伏此來襲我率眾往搜殺之衣其衣而伏之使人

持幟登香爐峯聞砲聲則應吾餌之出隘也翼日公泊魚腹賊哨果出
戰未合佯退賊爭逐之砲起伏應前後夾攻之賊死者千餘人遂進攻
巫山擒賊將王鳳岐斬其子徐公以兵從山後出會于巫山縣禁擄掠
公令軍士人持米一升抵夔州城下食明日復戰所至披靡連下十二
城三月初八日抵重慶偽侯譚納款諸城皆降公以久戰之後積勞成
疾至是益甚奉

命回鎮彝陵公慮賊黨未盡日草利弊條畧不已五月二十有四日病
篤強起草遺疏明且更服拜疏囑其子以忠貞守清白立身先孝弟無
一語及他事頃之有聲硃硃然流于空遂卒時六十有三歲疏聞
贈特進光祿大夫子一品祭葬准一子來京酌用卹典有加焉公生四
子長德龍善騎射總督蔡公愛之初授千總加守備都司戰常德時招
歸州山寨三千人稟公命不妄殺戮累官懷慶遊擊居宜昌次德輔延
川縣知縣次德麟次德輝德麟年十五應

召入對稱

旨爲長沙衛守備五調至參將

誥授驍騎將軍驍騎勇畧過人能詩文愛書史事母王夫人以孝聞喪

親十年哭之哀每伏臘及新食輒流涕慷慨好施與不治家人生產嘗
曰久宦之後子孫易爲奢又益之厚資以墮其氣鮮不爲患昔先大夫
奮起百戰之餘卒成大功然時爲糲粥食之此以示子孫無居功無敢
奢也吾將遺之以清苦使勿忘先人王夫人先世居楚之孝感每言故
邑風土醅美驍騎奉遺命卜居且定康熙六十年卒于官子紹鼎紹曾
自廣州歸葬于孝感遂家焉紹鼎甲戌進士第一官編修
論曰古稱名將豈特以勇哉蓋必有士君子之風焉張鳳鳴謂子曰吳
逆叛時吾楚有胡公者力戰奪陳陵磯人比之常開平至今談者猶津
津也吾以告胡子紹鼎曰吾祖也因得悉公事鼎又曰吾祖自幼以
孝弟聞兄早卒撫兄子如己子方旋師沔陽秀才童綬世以誣謫成親
老無以養號于途憐之爲脫其罪是年舉於鄉復贈金爲公車費嗚呼
可謂君子矣

鎮南大將軍蟒公吉圖傳

魯會盟

蟒吉圖滿洲人以任子起家沈毅饒將畧隨征滇黔力戰奪鐵索橋有
功康熙十二年冬逆藩吳三桂據雲南反吉圖隨征南將軍尼某援粵
東隸將軍舒恕戲下以功擢副都統守肇慶十六年春僞將馬雄圍肇

慶急吉圖潰圍北走江右藉兵賊簡騎三千人躡其後有白馬騎將刃
及其馬尾吉圖旋馬發大黃殪其將騎不敢追韶州叛將張星耀邀擊
復破之經七十餘戰踰三月甫達信豐賊將王割耳帥精兵萬人薄城
吉圖以羸卒五百偽建旗幟鳴鼓挑戰潛遣奇兵出賊軍後賊墮水死
者無算大亂敗走乃會將軍舒恕於贛且解南康之圍捷聞
聖祖壯其忠勇志義璽書持節佩鎮南大將軍印且曰咨汝平兩粵之
地將軍舒恕以下不用命者斬之是時吳逆方張叛者蠡起尙之信耿
精忠以王爵叛孫延齡以將軍叛鄭蛟麟以總督叛劉秉政羅森曹申
吉以巡撫叛馬雄李本深王輔臣嚴自明線國安以提督叛吳之茂祖
澤清譚洪揚來嘉祖宏勳劉進忠阿爾泰郭義張星耀佟國卿苗之秀
以總兵叛偏裨以下不能指數三桂獨深忌吉圖及傅宏烈宏烈者巡
撫廣西兼撫蠻滅寇將軍卒諡忠毅者也七月偽將馬寶胡國柱寇韶
州裹糧坐甲尅旦夕期吉圖自廣州疾馳入視北城衝急築土城賊晝
夜力攻雲梯容百人蔽以黃牛之革繪以虎文吉圖令持夷矛攢刺之
立斃賊踞筆鋒山俯瞰城中發礮擊城屋瓦俱震女牆頽壞守陴者不
能立賴土城固賊終不能入遂築長圍爲坐困計而吉圖先遣一軍駐

白土邨衛廣州轉道軍食不匱賊又乘夜渡江東擊蓮花嶺遏援兵吉
圖所檄江甯將軍額楚赴援與賊遇殊死鬪吉圖出城中兵夾擊之總
督中軍又帥師西來以肇慶兵橫擊之賊大敗棄車重遁所殺賊將十
三人生擒五人獲甲仗糧糗以大萬計韶城獲全吉圖之力也廣東既
平遂請與將軍傅宏烈復廣西
聖祖許之八月同宏烈擒偽將軍趙天元復梧州陣斬偽總兵張元復
潯州又遣參將尉光裕復平樂十七年春吉圖兵少退保梧州
聖祖以廣西未定吉圖不進兵下敕曰蟒吉圖藉口綠旗營壘失陷退
至賀縣徑回梧州頃諭駐鎮梧州兼策高州今宜以時進討慰粵西百
姓之心毋蹈前所爲閏三月吉圖進兵失利上章自謝還鎮南將軍印
綬有
詔歸印綬立功贖愆五月擒偽總統饒一龍復鬱林州及北流興業陸
川博白諸縣時偽總兵梁子玉賴天錫聞吉圖兵至固守白米嶺峒山
勢壁削林箐叢密吉圖於四月十六日蚤乘霧蟻附攻破之斬子玉及
賊兵五百二十餘級生擒二十一人天錫僅以身脫吳逆聞兩粵反正
遣其孫世琮率僞將軍五人總兵十人練兵十萬由宜章寇廣西軍容

甚整總督金光祖與戰不利兩粵復震江甯將軍額楚赴援戰於藤縣
又不利十八年正月世琮犯梧州吉圖分滿漢兵為左右拒舍偏兩之
一前進後休軍無惰氣兩軍紛拏火器具舉世琮不支大敗棄軍宵遁
初吉圖疏言藤縣失守梧州勢危當出死力爭之至是鬪無不一當十
聖祖有詔勞焉遂

命與傅宏烈進取滇黔師行有期而吉圖瘍發於項竟卒民思其功附
祀伏波將軍廟中卒之前三日有巨蟒蛇見於柳州山麓吉圖射之或
止之吉圖歎曰吾為民耳矢中其項蛇斃次日吉圖項腫大如斗遂不
能軍人異焉

論曰以昔所聞將軍產時有蛇祥及死也以射蛇異哉蛇之有神也抑
晉杜預宋蔡襄類耶要其功業偉矣

又鎮南將軍墓表 汪士鋐

吏部郎中布瞻君出為通州坐糧廳三年漕政無缺余為文頌之君來
謝曰余之得至於斯也非余之能皆吾祖舊德之所遺留也吾祖鎮南
將軍削平兩粵以死勤事
天子明其功而賞其罪柄政者不可卒從吏議賴

天子仁聖始終保全後三十餘年

天子篤念舊勞推恩子孫布瞻得以王府典儀特授護軍參領不逾年
復擢文職為吏部郎中自顧孱劣末由仰酬

聖天子恩澤惟念吾祖功在疆場獨
天子知之使遂湮沒無聞是上辜

聖天子之恩而重余之不德也今墓道之碑缺而不書先生其為我表
之死且不朽余以發潛闡幽史氏之事也其何敢辭

國初諱吳達禪者君之曾祖也以勇力聞從龍入關拔城得三等世職
阿達哈番鎮南將軍其長子也諱麟吉圖襲職以固山大防禦江甯康

熙十三年吳三桂反滇中分道出討公以副都統率師入粵受將軍舒
恕節制分駐廣東肇慶府時尚之信反粵中賊帥馬雄等圍肇甚急外

無救援城中總督金光祖巡撫陳鴻名麾下兵亦叛公提孤軍千餘人
突重圍出九嶠十八洞轉戰二千餘里身經大小七十餘戰時下馬步

行或士卒病以所乘騎與之其勞更甚踰九十日始度梅嶺聞賊將困
信豐公收復殘卒數百人救信豐至贛州與大軍會公自具棄城退保

狀請寘於法

天子不之罪也及實授副都統拜鎮南將軍兼護軍統領密授方畧四品以下官許便宜行事公宣布

天子德意勦撫並至康熙十六年夏四月大軍過梅關降其渠帥五月復南雄韶州時都統穆成格守韶州賊帥馬寶等有眾數萬環攻累月

公保蓮花山以通餉道內築土城以拒之城潰者數矣賴土城獲全公遺書馬寶而身自與戰擊走之冬十一月師次蒼梧復桂林保潯州克

柳州復南甯廣西悉平是時朝議欲急進兵滇黔公以兩廣初定賊將馬承蔭雖降猶宜為犄角拒守否則恐承蔭之躡我後也力持不可密

疏奏聞已而承蔭果復叛公親督戰懸厚賞以巨砲擊之承蔭勢蹙復降遂班師南甯至潯州公疾作猶張目奮身調兵進發遂以卒公之既

平廣西非逗遛不進也以貴州四川去滇中尚遠惟廣西密邇交趾可

由安南至金沙江直達其境公將假道安南圖之會安南權國事莫王清與安南黎王構兵公撫諭其眾使與和好安南王感動遣使入貢復厚遺公公卻其儀而納其貢

天子嘉公智畧將召見公公辭曰封疆任重不可輕離必欲召臣臣謹圖形以進其後公薨於軍而由安南進滇之謀亦不復行矣公卒之日

煙雲滿室大星殞天鼓鳴其兆尤異者師方行軍士言曰有大蟒當道

公曰殺之或曰公名蟒殺之不祥公曰我受

天子命勦除逆亂夫何畏軍士一發中其項公遂病喉不起矣年四十

七喪歸南甯百姓感公德羅拜於道後為繪像入五公祠以比公之功

於伏波也公約士最嚴師行之日秋毫無所犯既克韶州賊將張星耀

鼠竄公籍其家一資軍費不以一錢入私橐獲其妾良家子也有殊色

公嚴禁軍士無汚辱而召其父還之蓋公嘗奉其母夫人之命毋殺降

毋掠民故謹守不失也初朝議削公世職與其弟博和禮弟曰吾兄平

粵有勞績

天子常褒之吾不可使吾子孫復襲此職也乃以公之孫撫為子使以

次承襲即布瞻君也後君得王府官復辭不就仍與其子始

天子不知君為將軍孫也後乃知之故不次用君及為郎中以公事望

誤當奪四級亦特留本部皆異數也

史氏曰

天子之報功者厚矣故表而出之以勸天下之忠於君孝於親勤於職

以無愧其先者日講官起居注左春坊左中允兼翰林院編修南書房

史氏曰

天子之報功者厚矣故表而出之以勸天下之忠於君孝於親勤於職

以無愧其先者日講官起居注左春坊左中允兼翰林院編修南書房

以無愧其先者日講官起居注左春坊左中允兼翰林院編修南書房

舊直汪士鉉撰文并書及篆額康熙五十九年三月二十日

漢軍副都統高公必盛家傳

查義

公諱必盛字遜臣號際斯系出齊子高世爲渤海人唐貞元進士充鄆節度使判官曰沐者其遠祖也有明中葉徙遼陽爲遼陽高氏王父任國初從龍入關分隸鑲紅旗漢軍遂爲奉天鑲紅旗人父象極順治戊子科副榜爲廣昌令公自幼儻不羣讀書通大義善屬文時隨任廣昌同城守備高公一見奇之妻以女迨後廣昌公以事去官命公奉母入閩就季父任閩去京師六千餘里遇賓興不克還就試然學殖且日進矣未幾廣昌公歿家無餘貲既終喪喟然曰吾已不逮祿養吾父矣有老母在而區區佔畢何爲者由是棄舉子業益精騎射康熙元年有旨考較旗員子弟公中選除驍騎校甲寅藩變加提標遊擊從議政王南征有功晉秩右都督補江西饒州府參將十五年饒城改設總兵官裁缺復補廣信又以功晉左都督邁母喪哀毀骨立僚屬進慰曰公膺專城重寄餘寇未甯何至是乃稍進糜粥焉二十一年凱還王入復命上詢軍中才畧過人者王以公對尋陞授雲南開化總兵開化故裔地新闢處南詔極邊山阻而澗紆民獠雜居風俗獷悍萬里投宦類難悉

其情公彈壓十八年內安外攘寬猛交濟喁喁向化者延頸相望公之猷畧過人如此往建昌之役僞將易都督擁眾據新城矯箭控弦與我軍相持數月不能下公至身先卒伍冒矢石登城手刃數十人城破殲其眾賊遂平逆夥朱茂才乘機煽誘率眾萬餘人圍攻進賢王移師救之兩軍相拒賊方陣意氣驕橫公語同列曰亟擊之兵法在攻其不備同官聞言股栗公自率十八騎繞營右鼓勇殺賊賊蒼黃失措疑神兵從天下果驚潰王領之曰此驍將軍也解乘馬以賜其任饒州也城爲土賊陳鳳柯升王用等蹂躪殘破軍民四竄官吏匿他所空城荒穢公涖任艤舟江澣時身被創痍困甚猶力疾入山搜捕餘黨招集軍民爲之生聚防護境賴以安迨饒城缺公方依江督董公奉檄會剿流賊江拐子楊一豹等次第蕩除又有朱道士者號召土民匿山倡亂燹至風起公方涖廣信不旬日得鄉導悉其虛實一夕率輕銳前往擒賊首於攢峰密箐間餘眾瓦解主軍欲盡誅降者公請分別首從全活者數百人前後著績甚偉

朝廷稔公名內擢副都統軍民僚吏聞報願詣闕留公公撫慰之曰天子聖明我去更有好官汝等第安職業循禮義自然衣食豐足與狂

獄無干眾聞公言歛歔泣下如失慈父母至京視事逾年循例請致仕
退居安肅之后營村築敬一軒儲古圖書課諸孫讀書其中又二年卒
年六十有九公生平畧地攻城雖以韜畧著然倥偬戎馬之閒恆以鉛
槩自隨蓋所好然也任滇南日繪其山川要害疆域之遠近風俗之所
向尚著夷人圖說一卷俾後之宦斯土者知所考鏡云子四人一殤餘
俱登仕籍

許少保貞江右戰功記

潘耒

余自少讀史傳見古名將戰功奇蹟未嘗不慷慨太息想見其為人至
如遷史之敘田單韓信班書之傳李陵陳湯范書述光武之戰昆陽耿
弇之平張步其文精采倍常至今凜凜有生氣是知戰功待文以傳而
文亦藉戰功以奇也頃在史館嘗恨明代將帥功績載於狀誌碑傳者
都不詳惟唐荆川爲沈希儀敘廣右戰功曲折明盡如畫据以立傳更
可比美前史故知當世不乏奇功特載筆者聞見有不及耳若今少保
許公之鎮江右其戰功可得而述焉公諱貞字蓋臣閩之海澄人初爲
鄭氏將康熙初年以左都督統所部歸朝
詔仍其官駐九江己而移屯贛縣居久之滇黔變作湖湘諸郡皆陷而

耿精忠反閩中出兵杉關廣信建昌撫州諸山賊蜂起應之州縣大半
破沒其所遣驍將賈振魯者規取贛州以通楚寇陷石城圍甯都勢張
甚虔人震恐公在屯間發憤歎曰鼠輩猖狂乃至是乎大丈夫立功名
報國家此其時遂以十三年五月二十四日起兵赴援時公閒居久部
曲多散去衣甲器械不完而公常教人舞籐牌用挑刀人多練習乃椎
牛釃酒集屯丁諭以忠義大節聞者皆感奮得選卒四百率之行賊眾
數萬營於黃坊所過無敢撓鋒見公偏師前不爲意公大呼突陣跳盪
無前籐牌軍一躍數丈人馬辟易搏戰數十合賊眾大潰斬首數千獲
甲幟礮矢無算於是軍容始可觀乘勝解甯都之圍復石城斬首三千
八月賊圍興國急公馳救之立解勦零都瑞金盡平天華長樂伍遷白
奇諸寨招降李婆紅旗石寶諸寨賊眾數萬出難民三萬餘人囑有司
加意拊循督撫交章上其功加太子少保時公威名日盛閩寇畏之潛
遣辯士以高爵誘公他寇亦多遣人致書進說公一不啟書械其使以
聞願遣閩人饒元結僞總兵張存歸朝存据順昌以牽制延汀耿孽大
患苦之於是
天子知公赤心可大用擢公總兵轄湖東三郡駐節建昌以十四年六

月視事未逾月復宜黃崇仁樂安三城建昌先爲賊据安親王復而守
之顧環城數十里皆賊賊營於麻姑山蕭家爐楊華芙蓉諸山寨者無
慮三四十萬逼城而軍耽耽下瞰親王以爲憂公徐白王曰賊雖多易
與耳請破彼一寨以爲驗王尙未知公之善用兵也姑應曰諾公出賊
不意以夜二鼓疾馳勦蕭家坪冒險突上黎明破之王晨召公不至聞
其出勦也大驚惟恐失之已而公還獻捷王乃大喜賜食慰勞於是王
知公果良將可屬大事遂以建昌委公而身率師自袁州進攻長沙留
滿兵五百公部卒僅二千賊聞王軍西行度城守益單以十二月二十
八日併力攻城一軍駐城東之沙坪一軍駐城東南從姑山一軍薄南
門城東多民居沙坪平坦他將請攻之公不可分遣裨將守南門而自
將銳卒衝從姑山高山賊渠屯焉不虞我軍猝至倉皇迎戰大敗遁走
而賊之攻南門者方鳴張公自山馳下掩出其後賊大驚表裏夾擊盡
殲其眾自是賊膽落不敢復議攻城矣捕得生賊言賊度官軍必攻沙
坪則出兵糜我而從姑山之眾下焚民居官軍不得還城卽破矣今驟
攻從姑則沙坪之眾弗能救也諸將乃大服麻姑山最高賊眾數萬踞
其上環而寨者數十里一急百應公默計方春水發溝澗皆成河諸寨

隔絕乃可破也於是按兵休士顧就麻姑山麓平敞處時時引兵操演
賊初見兵來以爲將攻已也擐甲執戈以待公操罷徐回久之賊益懈
不爲備春水暴漲賊爲浮橋相聯絡公密具舟積薪其中十五年十月
晦公復引兵出操士卒皆不知將攻麻姑也抵山麓忽引而上直突賊
營賊分眾掠糧于外留寨者不意大軍猝至惶駭不知所爲而別校分
駕薪舟燒絕浮橋他賊不能相救一日破六十餘寨積屍滿谷煙焰塞
天於是南山之賊皆盡而城東二聖山聞寇耿二營焉其餘沙坪紅門
梓木嶺諸賊蜂屯蟻聚不可勝數公計賊眾且有備故爲緩攻以懈之
五月五日當競渡眾謂賊在近請已之公故縱龍舟往來盱江置酒張
樂會諸將聚觀賊熟視不敢出聲息公益知賊虛實遂以六月六日進
勦二聖山直衝中堅賊所恃礮火弓弩我軍肉薄而上籐牌蔽身矢石
不能傷長刀一揮甲札皆徹賊大敗耿二踉蹌遁去連破四十營斬馘
無算餘賊盡走入杉關自王師西行建昌危于累卵公獨守孤城者七
月以饑疲之兵二千當方張之賊數十萬而胸有成算整暇從容卒能
以少擊眾以弱摧強盡殲羣寇安簡二親王屢致諭書褒美文武大吏
倚公如長城焉七月復金谿南豐八月復廣昌九月復瀘溪累功授世

職十月破賊蓮塘十一月援南豐十二月復新城追賊至杉關於是湖東三郡無賊而吉安寇韓大任者驍勇有智數號小淮陰與官軍久相持不下糧盡出走以十六年五月入樂安簡親王度攻大任非公不可檄公提師擊之遇于跌水嶺大任所將多邊關勁卒垂死猶反鬪公與之一日八戰彼此疲極坐睡少頃輒起復鬪我兵益奮寇不能支奔甯都眾猶二萬屯於都湖立木城畫塹而守公攻圍兩月寇出挑戰輒不利乃棄城潛遯公星馳追躡蹙之于永豐又蹙之于黃塘虎峒其眾死亡畧盡乃投閩康親王軍前乞降以公窮追力戰故也十七年正月平廣昌之籐弔楓樹二寨諭降偽將饒大武等五十餘人兵民五千餘二寨舊稱天險四面懸崖攀籐猿掛而上頂寬平可容數千家有池不竭粟支數年公乃營于對面永安山多製火器會天大風發礮焚其廬賊升屋救火遙縱火筒擲之不得上須臾灰燼賊窮乃乞降先是麻姑二聖之賊既滅公念餘黨不足窮捕遣人四出招撫偽總兵揭斯進等偽將軍楊玉太等偽都督余雄等先後受撫者三十餘輩凡將吏千餘人兵卒數萬其或不聽命亦不遽加兵徐徐曉諭之初過廣昌偽將軍劉汝桂等不就撫而潛遣人入營探聽公引令遍行營中曰吾軍虛實恣

汝觀之歸語汝將欲降則降不降善守汝寨吾今未加兵俟軍還仍不降攻汝必矣宜固守某險要不能守而破者玉石俱焚毋悔廣昌民欲薙髮公曰徐之吾未能留兵兵去賊復至必僂汝吾歸滅賊汝薙髮未晚也民皆感激泣下汝桂等服公威信亦率其眾出降公仁而有度皆此類也諸山寨初或恃險不即降及籐弔楓樹平相顧詫曰二寨猶破吾等向若不降無噍類矣是年七月

優詔褒獎晉公提督兼轄饒州南昌吉安凡六郡其冬

命提督江西全省軍務所部將領俾自擇補用不拘成例以公熟識其才得收指臂之效也劇賊江機楊一豹者踞江許山爲巢四出剽掠公會師勦之自錢村入賊立木城爲三關深溝堅壁兵不得進寨後有高山公遣人間道攀援至山頂下瞰賊巢第苦乏水饑疲不復能鬪乃命截竹爲筒盛斗水人負一筒裹乾飯宵行黎明至山巔恣飲飽餐以待賊望見上山迎鬪我兵乘高擊之賊披靡墜崖谷死乘勢至寨後鳴角聲炮賊守關者聞之謂官軍已入寨皆散走大軍長驅而進盡犁其巢賊首走雞公山猴子嶺封禁山皆絕險人跡不到輒躡其後襲破之又走洪山山有黃巢殿自昔官軍無至者公又破之十八年四月追賊至

江許山卽賊巢爲營賊謀夜劫營公謂得之令鑿地三尺以其土壘垣三尺城塹立就士露刃植立垣下戒賊至毋得出聲而別遣將伏林中賊果夜至忽見垣塹嶄然大驚發火見垣內白刃如林惶怖反走伏兵出賊狂竄相蹂躪死進破詹源老巢江楊等亡入閩歸款論功復加一世職二十二年二月

命移鎮廣東公自起兵至是首尾九年凡遷官四加銜一加級五予世職三大功奏聞者二十餘次其餘小小戰績不可勝紀惟

天子嘉公忠勇召入陛見褒勞再三公叩首言國家洪福

主上天威小臣何功之有

上問在某處某處殺賊幾何公又叩首言臣逢賊便殺不記多少

上笑而頷之知公樸誠益重公公爲人廉謹和易謙退不伐平居左圖

右書接對士大夫恂恂儒雅不知其爲元功宿將也持軍嚴整禁部下

勿掠勿淫勿殺降勿俘良每出軍以都縣僚吏偕行破賊得難民婦女

輒帷置別室屬吏謹視之遣還其家破寨得積穀令軍民隨力負取軍

敢奪民僦以徇凡收復城邑他將有議攻山寨者公曰方亂民結寨自

保不皆賊也止勿攻所全活不可勝計以故江右人深德公家祠戶祝

迄今思慕弗衰云嗟乎自三藩倡亂東西交訌潭岳撫信之賊中相隔閩者虔州一綫地耳公崛起屯間扼其喉而不得進使賊連雞之勢不成遂乃偏師橫驚霆擊風驅令麻姑玉笥之間空無賊巢王師得以開

長沙掃滇孽而粵閩二寇縮爪鉗牙坐困井底同歸殄滅公之功在社稷不細矣而

天子重公尤在矢心報國丹誠不渝蓋嘗論將帥如公忠壯者無幾人

余從左右史之後謹據功狀論而次之俾異日傳功臣者有考焉

碑傳集卷十四

貴筑黃彭年編訂

碑傳集卷十五目錄

康熙朝功臣下

姚少保啟聖傳王源

又太子少保兵部尚書兼都察院右副都御史總督福建世襲輕車都

尉會稽姚公神道第二碑銘全祖望

光祿大夫太子少保內大臣靖海將軍靖海侯贈太子少傅施公琅墓

誌銘王熙

又靖海侯施琅傳陶元藻

又施襄壯公傳施德馨

又施將軍逸事李光地

威略將軍福建水師提督吳公英墓誌銘李紱 李安溪 代

福建提督藍公理家傳藍鼎元

廣東副都統陳公昂墓誌銘方苞


碑傳集卷十五

嘉興錢儀吉纂錄

康熙朝功臣下

姚少保啟聖傳 王源

姚少保啟聖字熙止浙江會稽縣人也生於明天啟四年甲子十歲能
 文十三歲補弟子員美丰儀性豪蕩不羈喜任俠膂力過人
 國初江南甫定公遊通州有土豪梅之公怒赴軍前請以家財佐軍求
 判通州許之乃權知州事既至立執豪杖殺之棄官去久之於蕭山縣
 城外見兩健卒驅二女行一老翁隨之哭問之其女也被掠公佯慰老
 翁勸之歸又好言勸卒稍稍資翁金卒許諾各俛首解囊公忽奪拔其
 佩刀手刃兩卒仆地下縱翁及二女去事聞捕之急遂亡命江湖數年
 乃易姓名籍於旗康熙二年癸卯旗下開科公舉第一授廣東香山縣
 知縣當是時雲貴既平明永麻亡所封延平王鄭成功遠據臺灣且死
 子經微弱其將黃梧以海澄降遂取廈門海烽俱熄內外宴然稱太平
 三藩者平西王吳三桂守雲南平南王尚可喜守廣東靖南王耿精忠
 守福建三桂可喜與精忠之祖仲明俱明降將破明有大功封王三桂



且執永麻殺之加親王故使三人屏藩南服統強兵宿將備非常於是
三藩之勢傾天下公初至香山澳門賊霍侶成弄兵大吏不能制公以
計擒之復叛又率奇兵縛以歸海始靖而督撫忌公才顧以通海劾公
將置公死公夜見平南王以危語動之王上疏白其枉督撫皆自殺而
公罷官初公將授室聞里何氏女英異有神力其父嘗設宴女出汲注
水三斛左右手挈其二而口銜其一以歸乃聘之生子儀年十五力舉
千斤能驅駟馬駕奔車自後掣之馬躑躅不能進十二年冬十二月吳
三桂反十三年耿精忠亦反尚可喜初不反其子尚之信脅以反所在
響應天下震動公掀然笑曰豎子反乎吾視若等池中蛙耳何能為
朝命親王某帥禁旅討精忠公與子儀募健兒數百赴軍前王大喜令
擊紫閩山楓橋諸賊悉平之授溫處道僉事益募兵自為一旅進破石
塘奪楊梅岡威名大振先是精忠反使人招鄭經經至精忠復拒之將
士多為經內應者經於是取泉漳諸府復據廈門日與精忠連兵精忠
戰數敗公又使儀破其驍將會養性于溫州十五年大軍入仙霞關長
驅向福州精忠以公往說遂降乃以公為福建布政使仍率其眾從征
勦是時尚之信亦降吳三桂頓兵湖南不出惟叛將劉進忠據潮州與

經為聲援而三桂將韓大任在汀亦謀歸經大任者為三桂守吉安被
圍久三桂不救乃棄吉安由贛趨汀為人多智善戰人呼為小韓信公
曰是可棄以資賊乎單騎至其軍說降之因以其軍臨潮招進忠進忠
亦降精忠之將也鄭經退師廈門未幾泉漳賊蜂起招經十七年二月
經使其將劉國軒吳淑何佑等復犯泉漳大軍屢敗公援漳敗賊于壁
鑪而海澄公黃芳世都統伯穆黑林敗績于灣腰樹提督段應舉戰于
祖山復大敗走保海澄國軒進兵圍之勢甚張六月即漳州拜公兵部
右侍郎兼都察院右副都御史總督福建數日海澄陷滿漢兵死者萬
數千人國軒乘勝破長泰同安分略南安安溪惠安永春漳平俱下之
七月圍泉州福建大震王公將軍眾十餘萬觀望不敢進公分兵救泉
上疏陳機宜請急救泉漳而廣儲待繕城隍險要鼓勵將士以待又
乘間復平和漳平以牽制之賊攻泉兩月幾拔聞援兵將至解而西九
月偪漳州精兵三萬號十萬壁於龍虎蜈蚣諸山距城數里金鼓沸地
公以蠟丸五檄泉州兵來援不至城中兇懼時耿精忠仍為靖南王與
滿洲賴將軍同在漳拒賊合兵不滿萬相顧無人色公笑謂之曰恐乎
賊狂勝而驕謂我不能戰若出不意奮擊之賊必敗賊敗即不復能師

滅賊平海在此舉矣戰也乃督兵出戰公貌魁岸長髯目有芒閃逼人儀更雄偉長七尺挽弓四鈞百步外命中洞甲結壯士鍾寶張黑子趙二王三癡等十人為股肱皆勇冠三軍公自募牙兵千人益之以大任之卒為三千人皆慄悍敢死無不一當百儀常帥為軍鋒故所向披靡及與國軒戰國軒大敗陣斬其將鄭英劉正璽等十餘人斬首四千餘級生擒千二百人溺死無算虜獲軍資器械不可勝計國軒奔海澄於是乘勢復長泰同安而賊不敢復出矣公善招撫開脩來館以納降不惜金錢重賄多行反間以攜其黨賊無義輕叛服陷以利即降不終歲將士降者二萬餘人公笑曰吾但以賊攻賊賊亡無日矣然海澄瀕海負險唇齒廈門賊因險為壘塹重阻深峻不可犯金門海壇臭塗澳諸島艫艫鉅艦相望守甚固相持一年不決公以其間大治水軍請復設水師提督而分兵絕其餉道賊乏食日窘會吳三桂死其黨退保雲貴賊勢益孤其五鎮將廖興黃靖等以數千人同日降何遜鄭奇烈陳士愷等各以眾先後降十九年公會巡撫都御史吳興祚提督萬正色合兵水陸大舉而招經所倚大將朱天貴亦叛經降賊大懼公乘間進兵連破其十九寨賊崩潰而公遣間賂經嬖臣某使為內應謀泄經殺

之株連數百人眾益叛遂敗經倉卒棄海澄金廈率眾逃歸臺灣福建悉平初經之祖芝龍明天啟時為海賊崇禎元年受撫授游擊使防海海汛止澎湖澎湖有島曰臺灣袤二千餘里沃饒產五穀紅毛地也福建飢芝龍請取臺灣屯田以資軍食朝廷許焉芝龍遂率眾驅紅毛屯之建五城以守官資其利而鄭氏益富強及隆武即位福建封芝龍為公弟鴻逵等俱列侯而芝龍陰送款于大軍之下福建者其子成功力諫不聽隆武遂亡芝龍自謂大功當封王而大軍給之入營執而北成功走海上號召其眾十餘萬據廈門奉永麻正朔與大軍相拒二十二年多所殺傷民困供億不聊生己亥入犯江甯敗去乃據臺灣朝廷慮其為患無已悉遷沿海居民於內民多失業益困及耿鄭之亂用兵數年殺掠流離死亡億萬不可勝數幸而存者供歛資糧械器剝膚椎髓莫能給驅役動數百萬加之饑饉而軍所駐奪民居并其妻女繫老弱為奴晝夜鞭箠亂下死者又無數公惻然傷之十八年上平海機宜十四事即有減滿兵之請及海澄金廈平遂請親王班師疏三上乃允而禁旅驅繫男婦二萬餘人以歸公重賂王請王令軍中敢有挈歸良民男婦者斬而公則以金贖之凡捐三十餘萬金悉贖以還民又請開

界復民田墓廬舍悉降卒仰食者墾其閒曠而列戍於其外所以安內而攘外也乃市牛種給之而數十年閩人患害無所控告者悉除之民始慶更生焉施烜者故鄭氏將其叔曰施福榮傭也芝龍并倚任之烜夙梟雄為鄭經所重因一倖臣欲殺烜烜遂來降初以為水師提督疑其貳

召入京罷水師提督公與賊相拒海澄計非水師不能克請復其軍因薦烜不用及金廈平中外無復以臺灣為事公獨謀殄滅之二十年正月鄭經死子少國內亂因請乘機進取復以百口保薦烜朝廷乃使代萬正色公厚資助之欲其相輔成功而烜知鄭氏必亡乃密疏請獨以師進二十一年五月將由銅山蘇尖開洋乘南風以攻澎湖公曰乘南風不如北風蓋澎湖南惟娘媽宮一澳可泊舟使賊固守未能克我軍退將無據若其北澳甚多進退俱便澎湖一下乘風直搗臺灣如破竹矣且時方夏颶風不時作不利遂不果二十二年癸亥烜卒請留公廈門獨帥師六月向澎湖國軒果守娘媽宮逆戰殺總兵朱天貴等將士多戰死烜敗漂泊海上不敢歸數日颶風不作而賊黨呂維等前密受公檄自臺灣間使招烜烜復進海水頓長遂克澎湖蓋天

幸也閏六月國軒以鄭經子舉臺灣降鄭氏自明末蟠踞海嶠歷四世六十餘年經雖敗歸尚以永祿紀年至是而明之年號始絕云公初晉尚書子滿洲世職而公厚養將士造器甲火攻戰艦用間招攜撫順前後捐金三四十萬吏部計例應加級至四百有餘乃加太子少保及克澎湖先登陷陣皆公所養將士軍資賞賚出於公者猶十餘萬臺灣平烜封靖海將軍靖海侯而公不復序鬱鬱疽發背即以是年十一月卒聞人無貴賤老幼莫不流涕肖公像祠之其歸葬也送者號咷數百里至今猶祠祭之不衰焉鄭芝龍之初起也廈門有浮石文云生女滅雞十億相倚人莫能解及台灣平乃知十億兆也女兆姚也鄭藏西酉雞也滅雞滅鄭也計公之生鄭氏初起鄭滅而公亦卒是天特以滅鄭氏而生公而公之生豈偶然哉儀以都督僉事充狼山總兵官後補偏沅卒于任耿精忠以福建平召入京與諸叛礮于市韓大任歸公未幾亦召入發旗下被甲以事鉗繫之數年始釋二十八年噶爾旦入犯隨大軍出禦死於陣野史氏曰吾聞姚公之令香山也幾陷不測既罷官識者多悲其不遇

而公之志浩然不衰未幾遂建殊勛五年秉節鉞而平海非氣運所關
之人哉其成功赫赫烏能或之先也閩人德之如周之思召公蓋其所
以造福於民者其德甚大而功甚偉有閩頌彙編紀其詳茲不具載
又太子少保兵部尚書兼都察院右副都御史總督福建世襲輕車都

尉會稽姚公神道第二碑銘

全祖望

康熙二十二年六月閩督姚公用密計授水師提督施烺下臺灣七日

破之

詔封烺為靖海侯而公自陳無功故賞亦不及是年十有一月公疽發
背薨歸葬於越嗚呼為子馮為楚畫平舒之策及其身後屈建成之而
曰是先大夫為子之功也歸封邑於其子羊叔子畫平吳之策於晉及
其身後杜預王濬成之而武帝曰是羊太傅之功也告之於其廟古人
旂常之公論如此其覈也唐裴晉公之平淮則李涼公不免有慙德矣
然涼公之有憾于碑非敢以揜晉公也特欲軒之顏允古通之上耳且
所爭亦不過在文字而酬庸之典則自晉公而下顏允古通固無不及
也今公以航海數千里之提封濱海數百城之巨患三世不賓之餘孽
累年籌運一旦而廓清之又並非為羊二公不及其身者之比而形已

信圭移之別將溘然長逝并不蒙桓鬯黃腸之澤雖在勞臣報國豈敢
有言而彼偃然開五等之封者吾不知其何以自安矣臺灣自生民以
來不通上國前明崇禎時鄭芝龍為海盜嘗屯聚焉芝龍既受招撫之
命而棄之丙戌芝龍降於

世祖其子成功不從聚其故部據有廈門金門二島以侵軼我中土已

亥大舉窺江甯敗去始取臺灣定為老巢而往來二島間為窺覷計壬

寅成功沒其諸將如施烺黃梧等先已降于我至是以兵平二島其子

經遁入臺灣兵不及萬船不滿百勢稍衰康熙十有二年三藩難作靖

南王耿精忠反於福建次年始乞師于鄭氏臺人大喜亟渡海而西閩

中故皆鄭氏恩舊精忠之海澄總兵趙得勝首約同官劉國軒等皆附

于經精忠始懼經遣人說精忠借漳泉二府以治兵精忠難之經怒遽

取泉州南取廣之潮州次年又取漳州精忠大懼吳三桂累為精忠請

合畫楓亭之界守之然不獲成次年三桂令尚之信割惠州賂經重申

盟然經兵不旋踵取汀州鄭氏復大振其時和碩康親王討精忠自浙
江入而公以前知香山縣罷官向與王有舊乃令其長子儀募兵帥之
赴王請自效王喜即令公以知諸暨縣從征進擊紫狼山賊破之又擊

楓橋賊破之而甌人之謀應精忠者俱殫王卽軍中遷公溫處分巡道
僉事駐吹臺益募兵自爲一軍進破石塘奪楊梅岡精忠之驍將會養
性至温州公使儀逆擊大破之精忠方震于鄭氏汀州之逼而大兵已
奪仙霞關而入公爲前鋒乃遣人說之曰鄭氏害日深而延建又失跋
前憲後其誰與守何不束身歸于

天子以求生而反貽鄭禽乎精忠狐疑公單騎至其營說之精忠享公
其賓客皆列侍公飲啖醉飽指畫仇爽享罷長揖徑出曰王自裁之精
忠曰是殆李抱真之流定不欺我遂降論功卽以公爲福建布政使仍
從征進剿鄭氏精忠之降也其諸將多畏罪歸經遂乘虛盡取興化
邵武而吳三桂驍將韓大任者世所稱小淮陰也爲三桂度嶺取吉安
被圍久援兵不接突圍由贛入汀將與經合公曰是雄兒也不可棄以
資賊復單騎至其營說降之簡其兵得死士三千厚養之卽以爲親軍
汀州平自大任降而公之威名益盛十有六年隨親王收邵武復收興
化尋盡收漳泉之地經遁入廈門公復挾大任以臨潮說其守將劉進
忠亦降鄭氏棄惠州而去七府既定或謂南荒其久矣公曰二島未平
莫高枕而臥也明年鄭氏果復出二月連下玉洲三汊河福河下滸諸

堡取石馬入鎮門又陷灣腰樹馬洲丹洲壁爐諸堡其驍將曰劉國軒
吳淑何祐而國軒尤競於是總督郎廷相嗣海澄公黃芳世副都統胡
克合軍漳州以攻之檄會甯海將軍喇哈達都督伯穆黑林之軍於福
州平南將軍賴塔之軍於潮州提督段應舉之軍於泉州畢至公以所
部敗臺人於壁爐俄而黃芳世穆黑林遇之灣腰樹而敗胡克邀之鎮
北山麓又敗公子儀自三汊河援之亦敗段應舉戰於祖山大敗奔入
海澄國軒取平和還圍海澄斷塹環椿飛鳥莫能渡沿海無賴輩從之
如雲於是

天子震怒將逮督臣諭王求其代者王及將軍以下合辭薦公六月乃
卽軍中不次拜公兵部右侍郎兼都察院右副都御史總督福建且令
節制諸軍急援海澄而以按察司使吳公興祚爲巡撫助公公馳督諸
軍至葛布山謀解圍而海澄食盡已陷應舉投縋死之總兵黃藍巷戰
死之官兵失陷三萬餘馬萬餘國軒下漳平長泰同安旁略取南安惠
安安溪永春德化諸邑七月圍泉州號稱十萬實六萬公分兵救泉亟
令諸將扼險要廣儲峙并繕治諸城堡而密陳於
天子曰賊之所以豨突而無前者蓋閩人爲之用也閩人自成功以來

積爲所脅故其餘孽之來靡然從之閩人絀而臺人張矣今必有以壯
閩人之勢當先有以固閩人之心而後賊可退又必出奇計使臺人反
爲吾用而後賊可亡是固非但爭衡于一勝一負之間者也
天子是之降璽書褒勞盡委以軍事且謂閣部諸公曰閩督今得人賊
且平矣公乃大布方略令平南將軍以下分道出綴之輕兵抄其餉道
乘間復平和漳平而總兵林賢等敗其水軍於定海九月國軒乃解泉
州之圍并力攻漳州大會二十八鎮兵爲十九寨列烽相望國軒以十
七鎮精兵三萬軍於西吳淑何祐以十一鎮精兵二萬軍於南請於大
軍決戰於龍虎蜈蚣二山之間公五檄泉州兵未至而城中惟平南將
軍兵及耿精忠歸正兵漳人憂懼公曰賊恃勝而驕謂我兵弱不敢出
若出不意奮擊之必敗敗則不復能軍平海在此役矣每日春容飲博
自如而胡都統以騎至台之亦僅八千人公卽以胡爲前軍自以所部
繼之分賴耿之兵爲後二軍前軍接戰不利中軍繼之亦不利耿兵繼
之稍勝賴兵復出國軒不支前軍中軍環而攻之連破十六營斬其將
鄭英劉正璽吳潛等生擒一千二百餘人斬首四千級溺死者萬數國
軒泗水而遁奔海澄官軍乘勝復長泰同安是冬公遣客中書舍人張

雄入廈公撫經不從十有八年公念海澄負險與廈門金門海壇相首
尾不可猝下乃請復設水師提督而大開修來館於漳州不愛官爵資
財玩好凡言自鄭氏來者皆延致之使以華轂鮮衣炫於漳泉之郊供
張恣其所求漳泉之人爭相喧述公時掀髯笑曰昔人捐金施間雖信
陵君之親而才廉頗李牧之武亞夫龍且鍾離昧周殷之骨鯁可坐而
盡也况豎子之游魂乎於是不終歲其五鎮大將廖瑛黃靖賴祖金福
廖興以所部降鄭奇烈陳士愷等繼之林翰許毅等皆被用鄭氏始上
下相猜阻而簡練諸降將之卒充水師益二萬餘人乃令巡撫吳公
與水師提督萬正色攻二島明年正月官兵逼海壇鄭氏戈船將朱天
貴故受公約首以所部五樓船三百卒降遂復海壇公待天貴厚以爲
親將竟用其兵盡破十九寨國軒茫然失恃棄海澄入廈門正色進兵
逼之國軒棄廈門金門奉經入臺灣其時成功之妻董氏尚在堂數經
曰汝父之業衰矣汝輩不才子吾聞姚公天人也其更無往閩土旣平
吏兵二部列上公功應加者四百餘級
天子晉公太子少保兵部尚書兼都察院右副都御史世襲輕車都尉
公子儀都督僉事總兵世襲騎都尉初閩人當成功之世內輸官賦外

又竊應成功之餉以求免劫掠奸民乘之日以生事而民之供億亦困甚于是遷界之議起定沿海之界而遷之城內出界者死成功雖以餉不接不復能跳梁而被遷之民流離蕩析又盡失海上魚蟹之利而閩益貧及耿精忠至封山圈地莫敢裁量且日益耗已而耿鄭之亂交作殺掠所至不知誰兵閩中駐一王一貝子一公一伯將軍都統以下各開幕府所將皆禁旅無所得居則以民屋居之無所得器械則即以屋中之器械供之無所得役則即以屋中之民役之朋淫其妻女繫其老幼啗啞叱咤稍不如意箠楚橫至日有死者加以飢饉而民之存者寡矣公自入閩蒿目傷心謀所以拯疲民者無所不用其極如除口卒革排夫鋪甲減芻役時與悍將驕兵悉力相持及鄭氏奔入海澄公言於王曰今陸地已無賊材官蹶張必不能秣馬而驅之波浪之間則所重在舟楫不在鞞鞅鞞也而軍需乏匱禁旅所養馬且三萬一馬日費穀斗有六升計一馬可支十人之食是撤馬一食足養水師三十萬人非但爲民實爲國也且禁旅久暴露矣胡不奏愾告閑乎王曰極知公言是然今耿精忠在軍居然靖南王也苟精忠不肯還京其奈之何故公連上三疏朝臣莫敢主者及廈門平請益力且令客婉說精忠令入

朝

天子乃允公詔王班師但留吳喇二將以善後既而盡撤之而禁旅將驅男婦二萬餘人去公流涕力請於王令軍中敢有私攜良民者殺無赦而公則贖之以金臨發盡取以還民禁旅得金亦各欣然而歸于是始請開界公言南海一帶俱有扼塞城寨可以列戍俱有田可耕而魚鹽蜃蛤之利尤大若分屯設衛令之開墾得與鮫人蟹戶參錯而居所

以安內而攘外也由福清而南臣已相度經營了然可措將開商市給牛種爲國家卹流亡而收甌脫自然之利保無患焉

天子遣一侍郎勘視亦弗敢主也公連章任之乃

報可自撤兵而閩人出湯火之厄更開界而閩人得耕漁衣食之資相與狂號喜躍曰姚公活我公乃大造八槳船艚船雙蓬船并請招紅夷夾板船以圖臺灣初鄭經有嬖人施亥者公密招之令擒經以自歸亥諾公而事洩會經死其嗣子克塽少公又結其行人傳爲霖將用我故臣續順公沈瑞以覆鄭氏續順公者其先明將沈志祥自遼左卽歸於我時已有恭順懷順智順三王皆降將故以續順爲名其後出鎮閩尋移粵耿逆之反并其軍遷之饒平鄭氏攻饒而獲之遂以入臺至是公

密約之糾合十一鎮刻日將發事洩瑞等死公又購死士入臺令縛國
軒者再雖皆不克然鄭氏益以此崩剝不知所爲方施烺之叛成功而
歸附也

世祖卽以爲水師提督駐海澄成功沒烺以平臺自任出兵不克頗疑
其貳

召入京不復用而水師亦罷公之以布政使奏軍事也卽薦用烺不報
及爲總督乃以萬正色任之至是請改正色爲陸路仍以水師用烺且
曰臣願以百口保烺必無他

天子始遣之旣至厚資給之是時閩人皆知鄭氏亡在漏刻公之入臺
特過師枕席之上耳其必用烺者特以其爲成功故將欲借之以爲先
驅而不虞烺之輒思攘功也烺至卽密疏請以公駐廈門而已獨以師
進時公已率師出海見烺疏不懌自陳請行

詔召公還廈門二十一年五月將由銅山出師下澎湖公主乘北風以
十月攻湖北烺主乘南風及時攻湖南公曰澎湖之南可泊舟者惟娘
媽宮耳使賊固守未能猝下我軍進退且失據若其北澳甚多進退皆
可依澎湖下而臺灣潰矣且盛夏多颶母尤宜擇地諸大將吳英林承

林賢陳龍等皆曰姚公言是烺諾之而頗不以爲然是年不果出師次
年六月乙亥烺竟以師行公又戒之如初烺竟南行國軒果守娘媽宮
不可入丁丑颶風與潮俱發我軍前鋒皆爲急流飄散國軒以精兵二
萬自牛心灣出其將林陞以精兵萬自雞籠嶼出夾攻我軍集矢於烺
之日烺懼時官兵泊八罩其地甚惡公遣使譙之曰不用吾言竟何如
矣雖然勝敗兵家之常颶風亦當止吾前所約諸賊將必有至者汝速
赴之烺得書且慙且喜而賊將呂翰等聞使果至烺復進澎湖水亦驟
長癸未朱天貴先進大敗國軒軍其眾爭降天貴亦死而國軒由吼門
逸去公遣吏卒以大艫運金繒貨米旁午來軍且諭烺曰凡降卒皆大
賚而遣之歸以攜臺人之心烺如言行之先是漳浦道士黃性震自臺
來降公以爲千戶性震自言能得國軒要領公遣之國軒曾以書密報
公然猶未肯遽降也至是性震故洩之于是國軒君臣自相猜旣敗欲
更出鬪其下莫爲用大兵遂由鹿耳門平行而入七月甲午國軒以鄭
氏降繳上成功所遺延平郡王漳國公招討大將軍忠孝伯御營都督
等印信除道出迎八月癸亥大兵前歌後舞悉入臺灣自公以布政使
隨征卽自膳部兵不資國帑及築修來館於漳浦所捐招撫金三四十

萬及贖難民所捐金亦如之至是策勳大賚又十餘萬而又未嘗絲毫
取之百姓莫知其經營所自出也公笑曰臺灣則既平矣然亦銷金一
大鍋子矣於是北風正利煇乃遣其子弟由海道自津門先告捷而後
上露布於公而公之告捷也使者由驛道行及至則後煇已二十餘日
天子既得煇疏大喜軒之在平瀆諸助之上而怪公疏之久而至也閩
士之仕乎京者亦皆先入煇之說莫有爲公言其故者乃以首功封煇
將以次及公公疏言此
廟謨天定微臣無力
天子疑以爲有懟焉未幾有
召掌中樞之命而公已不起前明故太僕沈公光文鄞人也從亡海上
由浙而粵而閩者廿年避地於臺灣其依鄭氏者亦廿年成功沒太僕
以經不克負荷頗有風刺幾爲所殺乃削髮爲頭陀至是老矣公遣人
首致問曰管寧無恙將具屣履送之還公薨太僕亦竟野死於臺鄭氏
之初起也廈門有浮石或視其文曰生女滅雞十億相倚丁庚小熙莫
能解也至是而乃知十億者兆也兆倚女姚也酉者雞也成功之賜姓
也蓋歲在酉天定之矣雖然公之勛業豫徵於六十年易代之先而不

見白於平成之日公之才足使海外之窮奇貳負革面洗心以向化而
不能使其同事之寮不負恩而背德公之智能豫定大荒風信軍行利
鈍之期而不及料捷奏之居人後亦何莫非天阨之哉姑無論平臺之
謀盡出於公平臺之軍器軍餉軍裝盡出於公而煇不過一將之力且
幾以方命違制致誤軍機卒之死戰克敵者皆公部下之士卽令竟出
於煇而亦思以百口保煇者誰乎是公亦宜受魏無知之賞矣則甚矣
煇之伎也雖然公之薨也百城驚悼羣聚而哭於都亭春不相降卒有
私爲持服者而漳泉二府之民爭乞公之遺衣冠葬之其鄉福州之民
乞留葬於城外之東山旣不得請麻衣執紼號咷送者直過仙霞歸而
各以私錢爲之建祠甚且有肖公之影祀之家者訖今將七十年閩人
語及公莫不太息以爲功之未酬不以靖海爲里人而右之也則亦可
以見公論之有在矣予又聞公之病疽也始於平廈門之歲時有鼓山
異僧者善醫延之旣至曰疾不足憂也天之生公將爲閩疆奏蕩平也
今事尙有待公未死也果不踰時而愈及臺灣旣定疽復發仍延之則
辭曰疾不可爲矣夫閩疆旣定公將死矣老僧雖在無益也嗚呼孰意
天責公以閩事旣成而卽翦其命天亦謂之何哉公諱起聖字熙止晚

字憂庵世爲浙之紹興府會稽縣人三世皆以公貴贈如公官其三世
妣亦如其階初娶何氏其後再娶俱沈氏享年六十公生而膂力過人
廣穎長髯目有芒如洩電閃閃逼人嘗游於松江守趙君署中午睡鼾
聲甚厲僮僕窺之則雕虎也大驚性豪蕩其使金錢如泥沙甫冠以諸
生遊通州竟得知州事既至立杖土豪殺之尋棄官去歸而遊于蕭山
之郊有二健卒佩刀驅二女一老翁隨哭之則其父也公陽呼二卒
與之語且勸以稍與翁金卒許諾公出不意奪其刀連斃二卒謂老翁
曰速以而女去然所殺者兵來跡捕急遂變姓名亡命江湖間不得已
籍於奉天鑲紅旗下康熙二年公疏請旗下開科試士
聖祖曰可公以第一人薦遂知香山縣甫下車澳門賊霍侶成披猖甚
督撫不能制公以計擒之俄而逃去公又以兵縛之澳門始平論功應
得上賞督撫惡之反以通海誣之且將置之死公夜見平南王尙可喜
而訴之可喜上疏言其枉督撫皆以是自殺而公亦罷官客粵中且無
以爲生時公年五十見者多歎其拓落而公之志浩然軍事起五年而
建節五年而成平海之殊勳幕下士自上客元從健兒走卒因之以取
高官者項背相望亦盛矣哉暨其薨蕭然無儲蓄諸子賣田以葬貧如

故子則謂公之沒而猶視者正別有在而不在于賞之有無古人功成
辭爵公亦何必不然而反以缺望怏怏公肯之乎獨是公拔身疏逃之
中驟致登庸大小六十餘戰皆親臨之遂以元樞持節計功雖足以上
報而未嘗得一入長安見

天子荷蘭一片土夙夜魂魄所經營既以牛酒夾道望見元老顏色而
未得一履其地以觀魁結之同風累年金革欲以角巾歸第之後稽首
天子賜歸剡湖而竟死於官則是勞臣之所耿耿者爾初何夫人絕有
力不止舉曰而已公聞而奇之因娶焉是生長子儀高七尺雄偉魁岸
千夫辟易嘗驅駟馬駕奔車自後擊之馬躑躅前卻不能自由挽弓四
鈞百步之外洞數札畜壯士張黑子鍾寶王三癡等十人嘗置左右令
募兵而教之酒酣出鬪無不一當百聞人望見先鋒曰是姚公子之旗
也以從征授知縣未上再晉秩累官尙書刑部郎改知河南開封府
詔以京堂用儀以少長軍間請效力從戎

許之不次授江南狼山總兵官尋改湖廣辰沅總兵官終於雲南鶴慶
總兵官平臺之役儀已去聞論者謂其與煇同行必有所以制之而惜
公之計不出此也支子三曰某知江南廬州府曰某未仕曰某知四川

石泉縣其出為人後子一曰陶累官直隸分巡霸昌副使實第二四子皆從公籍於旗而陶以爲人後故留居會稽陶亦能吏以守淮安時得罪於淮之達官卒爲所中而罷今知膠州述祖其子也伉爽稱其家兒與子爲同年生方詮次公奏疏文移爲平海錄如千卷而請列公祠於命祀

許之公之歸葬於越禮文一切未具更二十餘年而蕭山毛檢討奇齡始銘其塋道之石然嗛嗛有未盡者及考之北平王孝廉源之傳稍詳矣然與事多舛焉夫光烈如公

國史所取徵也若之何不備乃因述祖之請更爲文一通貽之異日嗣天子討論先世勛臣以光典禮必有以公之事上聞者予文或可采也其銘曰

有媯之後河嶽降精其嘘爲風其唾爲霆東甯小映化爲長鯨藉口故國以希橫行濤狂霧毒祝融厭腥遠竄未僵終待觀兵公笑而起不震不驚麾以黃鉞繫以朱纓舵樓閑閑風帆盈盈快飛桓桓水犀薨薨間使繹繹降幡繩繩所鬪者知豈事力爭天時地利不爽神明誰違公言幾喪其旌危關失險一夜潮平甲螺稽首百輩來廷奠彼南極浮石早

徵功成身賈君子無爭其不朽者三受降城宛委山頭想見英靈

光祿大夫太子少保內大臣靖海將軍靖海侯贈太子少傅施公琅墓

誌銘 王熙

康熙三十五年丙子春三月光祿大夫太子少保內大臣靖海將軍靖

海侯兼管福建水師提督施公卒於位訃聞上震悼公遺疏言海疆重寄填撫宜得人舉江南提臣自代列薦偏裨

以下材略堪任者備擢用又請葬於故鄉遂首邱之思而以子世范嗣

侯世隸守墳墓章下所司格於例上特旨悉如公所請予祭葬從厚加贈太子少傅蓋異數也越數月公

葬有期長子世綸以公狀請銘於子伏見我皇上隆禮勳舊恩意優渥公拓定疆宇盪平巨寇功在史冊炳炳麟麟

不可泯沒謹最公狀如左按狀公諱琅字尊侯琢公其號先世自河南光州固始入閩遠祖評事公始從福清分居於晉江縣之南潯鄉遂爲

晉江人至公父達一公舉丈夫子三公其次也少儻多勇略鼎革初與弟安侯從戎閩粵間時海寇方張金門廈門皆寇淵藪屢犯會城踞閩安鎮羅星塔朝命定遠大將軍統兵進剿素聞公名署公副將隨征

攻復閩安論功實授同安副將兩州為同安門戶寇築壘其上偪瞰縣城公晝夜防禦且守且戰卒墮寇壘尋陞總兵官會添設水師提督廷議推轂公遂以公移鎮海澄控扼全省時海禁嚴瀕海居民悉遷入內地寇剽掠無所得始聚屯澎湖攻據臺灣為巢穴而時時出沒島嶼間為患公偕總督李公率泰以舟師進攻寇迎戰敗之上知公練習海事遣大臣入閩招撫就問公公密奏可取狀遂授公靖海將軍統舟師刻期渡海會阻於颶風不果上輒召公入朝面奏機宜加公內大臣晉封伯留京師逆藩叛海寇乘間竊發攻陷海澄圍泉州犯漳州來往飄忽久之未撲滅總督姚公啟聖率銳師直抵廈門賊悉眾遁歸臺灣事聞上念臺灣一日未平則海氛一日未息即日召見公授方略賜御膳加太子少保令回閩治兵公計寇在臺灣所恃惟澎湖之險若攻克澎湖則臺灣瓦解乃以六月誓師破浪直進敵率眾拒戰勝負未決日暮泊舟入罩島水急石利舟不得住海潮驟長忽與島平颶風欲作遽止公以手加額曰天佑我師也鼓勇進攻礮傷目不為止諸軍繼之呼聲動天地賊眾悉披靡遂克澎湖公隨遣裨將諭

降而以捷書馳奏闕下

上大悅進封公靖海侯世襲解所御衣賜公製五言詩親灑宸翰褒美甚至偽藩納款公至臺灣宣播

皇上德意籍其戶口疏請於朝建立郡縣分置文武官吏興學校定賦稅海外悉平戊辰春

太皇太后升遐公入都哭臨

上遣大臣勞公於蘆溝橋入見慰問備至錫宴加等又數年疏請陞見拜起間

上命左右扶掖之公頓首言臣年老且衰海疆事重願更擇人解臣任上曰吾用汝心不在手足俟二十年後方如所請耳賜宴歸公在鎮十餘年以閩人罹海患久閩闔元氣未復一意休養生息其大指在寬以蒞眾嚴以束兵今瀕海數千里桑麻被野烟火相接公之力也尤敬禮士大夫敦尚文學治軍之暇多延賓客講論文史為樂天性孝友事父母克盡誠敬雖公務旁午定省不懈長兄卒以長子世駿為之嗣事叔如父撫姪如子至於平時故舊尤篤念不忘也春間出行郭外偶感風寒遂不起嗚呼公起自偏裨位至將帥晉秩宮保綰通侯印子孫世世

承襲功名之際可謂盛矣結髮從戎身經數十戰最鉅者在澎湖百年
逋寇不旋踵而滅濱海居民復生業者亡慮數百萬舟師估舶連檣於
萬里之外揚帆往來若履戶庭遐方寶貝麇至鱗集魚鹽蜃蛤之利充
物闔闔此固我

皇上盛德大業聲靈所加無遠弗届而當其奮勇獨進出入於洪濤巨
浪之間奏膚功建鴻績公之猷略豈不偉哉而又能謙讓不伐以功名
終雖古名將無以過也公生於某年月日卒於某年月日春秋七十有
六配王氏累封一品夫人子世綸江甯府知府世驥世驂世驥世驂世
范龔封靖海侯孫某某以某年月日葬公於某原銘曰
赫赫施公天挺英傑奮起行間克樹鴻烈一戰澎湖氛埃屏息淨掃鯨
鯢永銷萌孽畫井定疆設官分職皇圖式廓海外有截

帝嘉懋功通侯晉錫俾爾子孫作屏王室既壽且康視履元吉令終有
俶爰返幽宅炳耀鄉閭輝煌竹帛千秋萬禩此貞石

又靖海侯施琅傳 陶元藻

琅字尊侯號琢公晉江之海濱人貌魁梧方頤廣額膂力絕人幼時遊
里中定光庵詣神稽首見神隨拜起以語眾眾未之信也比長隨族父

武毅伯福於軍中時主兵者募壯士有鼎重千鈞命諸壯士舉咸以不
能對惟琅曰能從容舉於手翔步庭中數巡仍置於其所眾乃異之既
而從戎討山寇有功授遊擊時唐王聿鍵僭號福州授為左衝鋒嘗統
偏師迷入榛莽有虎導之行始與前軍會前軍望見琅與虎偕爭趨救
虎逸琅笑曰微虎吾何由至此眾大驚明亡鄭成功羅致之為左先鋒
相得甚軍儲卒伍及機密大事悉與謀嗣因成功將掠粵之惠潮以佐
餉琅不可成功弗釋復有將弁犯法當誅成功為之解琅不從由是成
功疑其背己欲殺之琅覺宵奔自度海上人皆成功牙爪渡必不能脫
緣山而行山故多洞乃匿於洞中俄而追者數十騎果至火光燭天大
索巖穴琅所匿洞忽生棘刺索者不可得歸報成功成功喟然歎曰吾
留一患與中原矣琅父大宣弟顯遂被害越數日琅從洞中出晝伏宵
行乃抵於晉從定遠將軍解福州圍授同安副將破泃州壘擒其騎將
降萬餘人陞總兵官旋陞水師提督成功卒子經猶據廈島康熙元年
琅密陳金廈可取狀
上嘉納焉即命便宜行事遂率將士搏其島克之降萬八千人晉秩右
都督靖海將軍入為內大臣封伯爵而島既破經收殘卒數千竄臺灣

偽將劉國軒以澎湖險要據澎湖經死子克塽繼士卒漸眾仍抗命猖獗如初二十年内閣學士李光地又陳臺灣可取狀并薦琅才可用總督姚啟聖亦奏琅能仍出為水師提督加太子少保駐廈門明年六月將興師籌畫指揮統其權於制府而親率其旅在提督軍門適候南風或言不利於行者琅曰吾泊舟地離賊遠北風起舟從風飄散非二三日不能集今夏至前後二十餘日風微浪靜夜可泊洋聚而觀釁不過七日舉之必矣且國軒為鄭氏梟將澎湖破則臺灣不戰而自下也遂行入澎故道皆為賊據官軍不得泊因次八罩灣水駛石惡忽潮漲石盡沒得平坦以渡國軒築短牆置礮環二十里琅遣前鋒藍理等奪艦直入會南潮發為疾流所壓賊舟四合琅親督師艚衝其圍總兵官吳英繼之殺賊將大小七十賊兵二千取虎井桶鹽盤嶼遂督師分三隊東指雞籠山為奇兵西指牛心灣為疑兵中又分三股攻賊堅壘賊堅拒良久總兵官林賢率先陷陣大師繼至呼聲振撼波濤自辰至申焚賊舟百餘殺其將三百兵萬二千有奇凡海洋占候雲合風生雷鳴風止將戰時黑雲起國軒方稚牛置酒相賀帳中忽聞雷鳴賊軍皆錯愕無措遂大敗遁歸臺灣我軍乘勝趨臺國軒就縛克塽降果如

出師時琅所料蓋琅家於海濱知澳島險易又向依鄭氏熟悉其上下軍情故也臺灣平琅由海道報捷七日抵京師而啟聖以飛騎由內地入奏後琅二日抵京

仁皇帝嘉琅功封靖海侯世襲罔替琅還朝以步履艱

命侍臣扶掖上殿恩賚有差年七十六卒於官諡襄壯子世綸世驃世范范襲侯爵驃為水師提督以康熙六十年朱一貴叛征討有功贈太子少保諡勇果其克臺亦以六月與琅平臺之期先後相符云

贊曰余聞琅泊軍安平海有廢井拜之而泉沸其精誠感格與漢貳師刺山泉湧者何異焉又聞鹿耳門有鐵板沙沈伏水底舟人必量水而行門甚狹又難連檣並進當琅師抵門海水驟漲四尺舟得並駕而入則平臺之績雖曰人力豈非天命與然琅不過一海濱力士耳卒能除國患復父仇忠孝兩全勳名赫奕嗚呼琅亦人傑也哉

又施襄壯公傳 施德馨

公諱琅字尊侯琢公其號聞之晉江人也族世里居別見先代譜牒不具志父達一贈公舉丈夫子三人公其仲也將誕母太夫人洪夢鼓樂從天神迎寶鏡來授母曰室小請置諸祠堂覺而生公少儻不類恆

兒薦紳莊公際昌一見大異里有神字曰定光庵公垂髫赴塾每詣神
稽首見神隨之拜起知者咸異焉既而贈公遭外釁家落公年未及冠
學書未成棄而習戰陳劍擊諸技於兵法無不兼精智勇爲萬人敵當
明之崇禎癸未隨族父武毅伯福軍中時主兵者募壯士置鐵鼎中庭
重不下千觔集健卒數千人莫有舉者公熟視曰無難耳奮袂舉行數
十武徐置其所容色無纖毫異又主兵之帳下有素以力著者莫能撓
其臂與公角竟折之主兵者駭曰神力也會泉郡山寇四起當事稔公
能命領兵剿捕後先廓清山寨三百餘所活民命不勝計觀察曾公櫻
偉其功欽禮焉比漳寇葉績徐晃輩憑陵都邑毒燄張甚公奉檄進討
績素猛鷲號莫敵公接戰揮大刀斷其頸賊眾驚潰遂擒徐晃降其眾
當事上其功授游擊將軍復追賊入潮陽草薙禽獮銳莫敢擾所招降
傑魁數十輩崇禎甲申明祚覆於闖賊時際
興朝定鼎宏光猶建號江以南以公將略素著由參戎晉副總兵越丙
戌隆武從閩中建號擢公僉都督任左衝鋒守杉關有百戰居先之獎
公奮力功多爲同輩所忌嘗統偏師前進而忌者後軍不繼勢倉皇公
故示鎮定竟前薄而營因乘夜從間道旋師迷入榛莽中有羣虎前行

導引得與諸軍合值廣信之師敗諸軍皆潰公冒越山谷不辨道所向
遇嶺上老人織屨詳畫指示以縮髻簪謝之笑不受不數武回顧則失
之矣蓋公之生平危而獲佑其靈異類如此既而承當事委從海道出
粵東戰勝攻克人以岳家軍目之亡何值粵師之亂公知勢不可爲獨
念丈夫功名不容泯沒須得當以自見也則率眾星馳自南雄抵潮郡
潮將郝尙久者陽犒師牛酒而陰召諸部圖公則拔眾走饒平踞守閩
月突圍出且戰且行連日夜間關險阻從弟肇璉肇序皆隨沒軍中而
先是在潮陽所招降戰士多散處村落聞公至皆迎拜擁護以行遂集
勁卒得八百人至黃崗鎮暫憩焉當是時閩事既敗永厓猶建號粵中
鄭成功託故明藩封樓海上素悉公英名欲倚以爲重遮入海禮遇初
甚渥凡軍事必咨商及有告以公嘗夢爲北斗第七星者鄭心忌之會
以糧匱議剽掠粵中公正色以阻有標弁得罪特鄭氏親暱逃於鄭所
公申軍法禽斬之復櫻其怒遂執公禁舟中並分禁贈公及家屬公弟
顯時統兵惠潮間聞信馳歸省亦被執禁譙樓焉而守公舟者爲林習
山帳下校林故敬事公屬其善待會有以危狀白公覽畢佯哂曰此易
與耳守者詢以故公曰藩欲吾輸金二千吾業有千餘再告貨數百則

足矣守者信為然薄暮則令守卒二十餘人隨往借貸行漸至寥曠所
公故坐不行守者疑環而前執公起仆數卒提守者揮擊皆辟易遂脫
身夜二鼓鄭氏果遣人欲害公見已遁歸報乃環島徧索而公實匿石
穴中已五日無從得食潛行山谷間遇田夫問道詰以行旅不當太早
爾何為者稍近物色之則錯愕長跪曰爾非施公乎本藩懸賞格購公
急猶在此乎歔歔泣下因留公至家告其母烹伏雌炊粥以獻其人貧
而孝公義之匿數日謀他適潛引十餘里拜泣曰公行矣誓為公死勿
敢洩以故公得乘夜潛達於蘇茂所馬茂故公部將時為鄭氏左先鋒
為人磊落抱義氣見公悲且喜匿之寢室旦日置酒召公諸舊將則有
鄭文星張猷楊文林照與其弟福等畢會酒既酣談及公茂故責諸將
不實力搜索諸將憤憾之越日復召飲怒責如初猷照憤不自勝投匕
箸起曰若為公心腹背義若此吾曹何面目與俱生文及文星解而翼
之出且令居外待吾入探其情人執茂手曰君今日情事豈別有機關
乎茂察其真誠乃曰君輩其仗義是吾心也遂實告以公今在是則與
人寢室擁抱而泣皆曰勢急矣謀脫公計而鄭氏已蹤跡至茂家搜甚
悉茂匿公牀被中茂妻坐其前故寒幃示之搜者視無有乃去是夜熾

舟以所親勁卒翼公揚帆北渡鄭氏偵知召訊茂披陳大義一無所隱
鄭陽獎而釋之後終以脫公故殺茂時武毅伯福已歸
本朝駐安平聞公信潛駕舟相待得入內地此天之所以玉成豪傑不
使泯沒而為

本朝建奇功者也鄭氏聞公脫身頓足曰唉吾不幸結此禍胎貽將來
一大患蓋知之矣當公匿山中時有欲掖公弟顯脫者顯曰吾去則索
吾兄必更急且慮并及雙親爾曹速為吾兄計勿以吾為念及聞公脫
則悲歌慷慨仰天自奮曰吾旦暮慮父子兄弟俱死無為耳今兄得生
勝吾生十倍復何憾哉顯英勇名與公並嘗鞭馬疾馳遇柵隘手扼其
上枋足夾馬馬不能前提戈縱橫敵陣中無不披靡者其孝友根于天
性雖被禁無怨言從贈公遇害神色不撓稱當世烈丈夫云事具公所
為弟傳中順治八年辛卯公駐安平方枕戈謀復仇值當事有異議撤
安平兵公乃仗劍之粵中從封疆巨帥平定高瓊雷廉諸州再克潮陽
復假歸泉郡投閑無事常與泉中賢士大夫交楊公錫璜者勝國遺簪
也重公才望為忘年友常見公獨居深念鬱鬱不得志慰之曰公非常
人也何患不雪仇建勳挂侯印肘後吾子孫猶世世席公庇也歲丙申

海氛游熾定遠大將軍以公宿望習海上情形命爲前部揚旗出烏龍江口而賊屯盡解制府李公率泰剡公勞績於朝授副總兵遂領前鋒薄閩安鎮羅星塔諸賊兵到處無不克者旋移駐同安與廈門賊壘相對公運方略捍禦前後擒其驍將數十輩所招降萬餘人賊由是氣奪而瀕海獲少安焉既而

朝旨命大司馬蘇公納海疆遼沿海邊界見公戰守機宜有古大將風列疏入告

特旨晉僉都督總同安兵康熙元年壬寅擢提督福建水師自茲秉鉞專閩而公始克展壯猷矣越年

上遣兵曹郎黨公古里察閩疆形勢公爲密陳金廈諸島可取狀比歸奏

天子可其策復命古里就公詢機宜遂下期進兵時陸師出金沙遇賊失利制府持重檄公暫止者再公業有成策鼓將士乘風波直薄金門廈門連戰克之賊帥倉皇不相顧遁歸臺灣其文武諸僞職領樓船接踵歸誠者萬八千餘眾凡鄭氏積年所盤踞東南諸島悉平冊功授右都督明年挂靖海將軍印統諸鎮征剿臺灣往往爲颶風所阻未克濟

師既而公復密陳邊患宜靖一疏亟欲爲掃平臺灣計

上覽疏召詣闕面陳所見時戊申三月也公至京朝議循於招撫撤水

師提督授公內大臣晉爵伯於時從容禁近每朝退熟覽二十一史鑒

古今成敗及名臣言行可法者一時賢公卿習與交遊皆嘖嘖稱有卻

穀儒將風計近光十有餘載會閩省以逆藩煽亂海氛乘之復熾時公

長子世澤以繼伯兄故在閩年少知兵平南甯海二將軍奇其才以副

總兵參段將軍事段北人不諳地利爲賊所困糧空援絕段帥死之澤

被獲賊素聞其能必欲降之羈守誘脅終不屈遂爲所害公聞之雖痛

猶曰兒能死國事可無愧矣而是時東南億萬戶漁鹽耕織咸失業

天子惻然念之歲辛酉進諸廷臣詢勦取臺灣方略咸謂海波不測難

以制勝遂巡謝不任

天子念壯猷碩畫無出公右者

召宴內廷諮進討事公拜稽首具陳海上肆毒幾六十年夫十日十二

子相對數窮六十其將復平今卜之天時揆之人事鄭氏氣數決不能

再延且臣料其一二巨帥雖號桀驁以臣視之非臣敵也因度已度彼

條奏甚悉

上大悅晉公太子少保復昇節鉞提督全閩水師陛辭日

上臨軒勞之曰平海之議惟汝予同其努力無替朕命十月公至軍練兵整船泊平海衛以需大舉衛地斥鹵舊惟一井僅供百家以遷界泉涸多年軍中艱於得水公就井拜禱甘泉立湧足供萬竈炊因勒石曰師泉志異也當是時議欲乘南風直搗澎湖先扼其咽喉而同事者多柄鑿公疏奏力以自任特奉專征

俞旨而諸鎮臣吳公英林公賢宋公天貴陳公龍揚公嘉瑞陳公昌皆以所部兵屬焉遂於癸亥六月議進師咸謂盛暑不利征戰公曰無憚暑兵法不曰出不意攻無備乎且不聞澎湖為南風澳乎先聚米作地勢示諸將曰如此入港如此泊船如此進戰不用命者無赦因大書諸將弁姓名於各船風蓬之上以辨進退別賞罰十四日乙酉由銅山進發越日奪猫嶼花嶼晚泊八罩水坡澳當是時賊已將偽鎮營官兵眷口監羈於臺灣紅毛赤嵌二城堅其死戰及至澎湖據各險要為壁蜂集大小戰艦於天妃宮上下添築礮城十餘座凡可登岸處盡築短牆置腰銃環二十餘里星羅碁布丁亥公督親標前鋒船七隻直入賊艚副鋒五船繼進斬殺賊眾無算焚燬賊船一十四隻時值南潮正發前

鋒舳艦壓疾流逼近賊壘賊艘復合協攻公親駕樓船衝入賊望見旌麾皆環迫鉤舟接戰公傷眼以帕漬血示無恙督戰益急在船將校皆奮擊殺敗賊船隨援出前鋒諸船而公子世驃猶子世祿亦冒矢石繼至會天晚暫收西嶼是日殺賊將大小七十餘員賊兵二千餘眾戊子全艚復收八罩嚴申軍令分別首功犒以賞金鼓吹旌之縛不用命者將斬以徇出紅白二劄令總兵官各書功罪以憑入告各鎮弁皆股栗匍伏願立功自贖具連保狀方并膏之己丑取虎井桶盤嶼庚寅公駕小舟親度要害設疑兵布置諸所以分賊勢而又故作羸師以張之癸巳分布戰艦以五十隻從東畔時入雞籠嶼為奇兵夾攻以五十隻從西畔暫入牛心灣為疑兵牽制而以五十六隻居中分為八股各作三疊餘八十隻為後援公居中指揮調度直撲賊巢賊舟四面齊出迎戰礮矢雨集烟燄蔽天咫尺莫辨我師奮勇呼聲撼波濤無不一當十百當千自辰至申鏖戰賊被焚殺浮屍蔽海水為之赤計焚殺賊將四百餘輩賊兵萬二千有奇降賊將百六十有五賊兵四千八百五十有奇獲樓櫓甲仗器械不計賊帥勢窮奪小舟從吼門遁走而賊之精銳全覆沒矣當其戰時礮雲乍起颶信將發軍中咸有怖色忽雷聲震雲

盡風收視海波恬如也此公之精誠英勇有以格天者是役也凡七日
兩戰而克澎湖三十六島安撫居民無秋毫犯或謂鄭氏有仇于公今
敗殘之餘譬猶釜魚籠鳥宜急撲滅以雪前恨公曰噫吾奉
命專征爲國爲民耳

天威咫尺豈敢先吾私怨若能銜璧來歸亦爲之疏奏於是悉放所獲
卒歸臺灣給以口糧其傷者濟以醫藥居臺之賊眾紛相告曰公仁人
也莫不感泣引領內向鄭氏已窮蹙而又覘公無屠戮意乃齎表詣軍
門乞降公爲疏奏八月統師入臺灣市肆不驚耕耘如故士民箠食壺
漿遮道以迎謂我等見公如見父母但恨晚耳即殊方雕題諸眾向不
屈于賊者皆重譯來歸願奉
本朝制度而前此內地軍民被獲于賊者皆僕婢畜之公悉按其籍遣
歸凡明之宗室王子避地海外各流落貧窘耕種草地度活公疏奏其
梗概請釋歸俾安置得所焉是賊之假明號以蹂躪東南數十年者原
止爲夜郎自大草竊荒餘耳當露布奏捷時適際中秋令節
上覽奏大悅即解賜所御龍袍製五言詩
親灑宸翰記其忠勇性成韜鈴夙裕勇奪其氣誠致其歸所以褒寵公

者非尋常戰功所敢望遂加授靖海將軍晉封靖海侯世襲罔替并優
敘從征各將士臺灣既平

上從公請留置郡縣建學宮立營制其田賦議者仍鄭氏舊公以海邦
新造正宜輕稅以示

國恩乃力疏陳懇

上嘉納之得減賦額十之四已復樞臣入閩議徙新附駐外省公洞悉
利害疏請就本省安置一力擔當絕不以市恩避眾謗蓋公素熟陸宣
公奏議凡先後入告諸疏皆以眞肺腑呈於筆札不假記室以故言言
剴切悉動

天聽戊辰朝京師

上命宗室侍衛額駙禮部諸大臣設供張三迎途次陛見暢春苑復
召對乾清宮

溫旨慰勞問地方得失甚悉公拜手摠誠以對

上命詞臣徐嘉棻橐筆記主臣投合盛事蓋異數也癸酉復入覲公春
秋七十餘

上顧其步履稍艱敕侍臣扶掖拜起

賜坐奏對因奏臣老力衰海疆重任願賜解職依闕下
上溫諭再三謂朕用汝心不在手足俟二十年後方如所請耳公拜恩
還任越三載以病薨于官年七十有六時康熙丙子三月二十一日也
遺疏入

上震悼久之

詔贈太子少傅諡襄壯命禮臣從優議卹賜葬

敕建碑文

諭祭者三閩中紳士軍民間公薨皆巷哭失聲羣立祠歲時祀之在在
奉爲明神有所禱輒應云公容貌魁偉沈毅有謀略用兵務持重計出
萬全不銖銖摹古人兵法而出奇動與之合至于臨大敵決大疑守之
堅定眾咻不搖故戰無不克而常以不殺爲念終立蓋世奇勳無異曹
武惠之下江南也嘗著五花陣法指授諸將至今傳習從公部曲起家
至方面大帥者指不勝屈平居喜賓客禮接士大夫雖功高位重秉圭
仗鉞猶促膝談書史論古人事當否疊疊不倦雅重儒行捐修文廟爲
士望所歸知音樂嘗集諸詞客製新聲譜之樂府饒有東山逸趣其待
桑梓甚有恩凡關民間利弊必咨當道興革之遇歲凶則糴諸隣境以

濟民食郡之兩石槁跨江橫互俱遭寇氛焚毀公鼎新之而利涉有賴
焉至天性孝友事贈公與太夫人定省罔攸懈被難後若節春秋雖備
隆享祀益滋飲恨悲不自勝撫弟顯之子韜尤篤曰吾弟骨血惟此耳
吾忍以己子加吾猶子乎拓建大小宗祠展親之事以次修舉任同安
時值瀕海播遷爲構廬舍給資斧以安諸子姓之失所者方之范文正
公之置義田其意豈異耶公有子八人孫數十人皆彬彬以文名武略
著其所以繩公緒慰公志而爲邦家之光者蓋如川之方至云
德馨曰余觀古之大帥秉鉞登壇建不世奇功萬里而取封侯者歷代
有之若公生於斯帥於斯樹勳錫爵於斯後先數十載皆不出吾閩中
豈不卓卓稱僅事哉說者以公爲閩中川岳降神雖功拓疆土澤被瀕
海數省而吾桑梓暨諸族姓尤蒙其休焉非虛言也余生也晚不及見
公少壯時事而得諸宗親父老所傳聞蓋十有八九矣因筆之以垂家
乘焉

又施將軍逸事

李光地

施將軍名琅閩之晉江人值明亂少而從戎曾隨大學士黃公道周出
仙霞關知事不可爲輒以偏裨有所建陳公報之曰君言是也顧吾大

臣仗義守死而已倘有他奇變可以佐時君輩行矣勉之遂謝黃公去
明亡寄食海上鄭氏嫉害公不相容囚公艙中欲殺之公以計遁脫鄭
遂殺其父若弟公歸

本朝用戰功數年間至大帥佩將軍印

召入爲內大臣列伯爵余素未深知公一夕就公燭下話道及順治己
亥年事余曰社稷之靈也令賊不屯兵城下驅而徑前者是誠可危公
笑曰宜何向余曰循山而東奈何公曰南北步馬不相若久矣眾寡勞
逸又懸所在雖響應作聲勢實觀望不能爲之助也纔涉北地與官軍
交賊立盡耳徐又曰向彼舍短用長者委堅城沂江而上所過不留直
越荆襄呼召滇粵三逆藩與之連結搖動江以南以撓官軍則禍甚於
今日矣棄舟楫之便而敝攻圍故知賊無能爲也余以是知公能明年
天子以海患久未熄復起公提督水師專平海事越二年余請急家居
邂逅公小店中雨甚稍憩余曰公出師在此月然眾皆言南風不利公
必犯之何也公曰賈豎之言也夫北風日夜猛夜則更甚自此至澎湖
舟戴星行就能魚貫相尾幸而不散然島嶼悉賊據到彼未能一戰奪
之舟無泊處坐與行殊風浪飄泊軍不能合也將何以戰夏至前後二

十餘日風微夜靜海水平如練可以拋舟泊洋聚而觀鬻不過七日舉
之必矣用北風者徒幸萬一南風則十全之算也然節候月離旬日間
當有颶風亦偶間歲不起此則天意非人慮所及又賊將劉者爲彼魁
傑設以他將守澎湖雖敗未服也必用再戰如守澎者劉或死或敗則
勢盡膽喪矣臺灣可不戰而下余喜曰寇平矣公笑曰何相信也余曰
聞爲將者必識天時地理利害向背較將之智力公兼之矣能無平乎
公以六月十四日舟發銅山十六日至澎湖二十二日剋勝果在七日
中戰之日東南角微雲起劉方調遣拒敵望見喜甚須臾雷聲殷殷動
劉推翻食案歎曰天命矣海行占風者以雲起爲風兆聞雷則散云劉
敗後乘小舟走至臺灣憂沮無復戰意率先納土悉如公料先是明季
鄭之祖芝龍海大寇也歸誠後貴顯嘗朝京師過龍虎山有異人爲決
未來事語甚隱然意若跨土稱孤爭衡南面者末云金雞唱龍種消公
辛酉生其專征又以辛酉年龍種者芝龍之孫也余十五六時便聞斯
語後二十餘年而驗

贊曰此余所聞見於公者雖其子若孫不知也公以功晉封侯爵及後
裔史臣當有傳故紀其逸事云爾

謹案原編有陳臺灣棄留利害疏論開海禁疏二首已見經世文編今不錄

威略將軍福建水師提督吳公英墓誌銘李紱代
公諱英字為高號媿能世居福建泉州之黃陵從徒大浯塘曾祖曰賓
吾祖曰振泉父曰登並以公貴累贈榮祿大夫妣皆贈一品夫人公早
孤值海濱搶攘用將才起家隨大師克平金廈功授都司僉書隸浙江
提督歲甲寅三檄並興耿精忠遣偽帥出仙霞關犯金華衢州旁入江
西海寇響應東南震動官兵進剿公在行間或間公閩人不可信提督
塞公獨深契之授公左營游擊公奮勵甫視事三日退甯海梅坑賊進
兵雙門解台州圍復破水賊張拱垣于三門港殲偽帥朱飛熊於毛頭
洋軍氣大振既鑲藍旗貝子富公至浙江視師提督首薦公即命為前
鋒公引兵揚言脩毛坪路陰襲涼棚取之斬賊帥劉安仁遂復黃巖貝
子奇之尋令復太平樂清等縣抵上塘遇賊兵二萬眾奮擊之斬數千
級賊將許奇保殘卒據綠帳隔河而陣公下令人負草一束夜乘潮填
河而濟大破之遂由猴孫嶺奪其堡引大兵直至青田偽帥連登雲以
十萬眾圍處州踰二載聞青田破餉道阻絕遂夜遁曾養性者耿逆之

梟將也擁賊兵數萬據温州乘王師初至分五路夜燒我營公急白貝
子令諸軍棄營據險軍以不亂公自率精兵據大羊山阻其要道復請
分兵五百抄伏敵後是夜賊衝殺數四公力戰達曙身中數創士不傷
者才五十人天明單騎突之大師繼進伏兵並起賊自相踐踏斬獲無
算公逐賊至温州城下銃傷馬顛復奮起刃十餘人奪賊馬以戰貫其
眾由將軍橋以歸初貝子收兵失公所在大賊既見公喜且泣曰以一
身當數萬眾戰終夜不殆神衛汝忠耶是役也曾養性僅以身免耿氏
精銳盡矣未幾還守甯波中軍適賊船二百餘艘直臨定關公偵得定
關守備方俊受偽劄為內應請提督立斬以示賊賊遽退守象山公復
請兵破之旋奉檄收捕大嵐山寇搜斬數百人餘黨潰散時耿逆已輸
誠而松陽遂昌山寇游魂出沒貝子駐師石塘召公捕之賊首馮公輔
屯戴火山素讐公威名出就撫其別魁林惟仁黃大相等擁眾黃鼻山
左倚懸厓右臨深潭以獨木為橋山廣袤數十里莫可蹤跡前督撫遣
人招之輒為所殺公令諸軍持三日糧夜腰繩魚貫上席草而下至楊
梅灘遇賊破之降其眾山寇悉平而海孽復熾陷海澄困泉州斷洛陽
長橋以阻援兵公以副總兵官從康親王救剿自仙遊分兵兩路出間

道解泉圍奪江東橋守之破砦十有九遂復海澄己未秋擢同安總兵
官明年率舟師合大軍進攻金門廈門賊棄兩島遁回臺灣會靖海侯
施公琅來提督海疆事議進攻澎臺引公自助遂以癸亥六月某日發
銅山取八罩直抵澎湖賊勢盛前軍被圍公單船拔出之翌日進攻殺
賊先鋒燒其船公所乘船忽為潮水衝著石上賊船火烈將及公副將
詹六奇駕小舟挽公避再三公以眾軍在船義不獨存堅卻之船忽浮
起士氣益厲戰彌力賊大敗燬賊船百九十餘艘殲偽官將三百餘員
殺溺賊兵五萬計俘者皆縱遣使歸諭以恩信禍福整眾臨之賊勢窮
納款舉土降施侯凱旋留公鎮撫其地自海逆負險造亂四世歷六十
年所公與施侯合謀七日而舉之
天子嘉公功眷待與施公埒尋調鎮舟山海寇洪煥等二千餘人聞風
歸命再擢四川提督破吳三桂餘黨楊善師九經等散其眾川中洊經
兵燹千村荆杞伏莽竊發公嚴塘汛懸賞購募獲積盜三百餘人斃其
魁六十三人於杖盜賊屏息鎮蜀十有一年施侯既卒
上念閩海反側非宿將莫能鎮撫遂調公福建陸路提督旋改督水師
凡十餘年前後如京師朝

行在者再

御書作萬人敵四字以賜加號威略將軍優以世職請老不許癸巳夏
上於熱河行宮

御製七言律詩一章將以錫公命諸王以下大學士扈從諸臣皆屬和
蓋追念元功所以褒崇之者甚備而公已於七月廿四日終於位矣疏

聞

天子軫悼下部議恤其孤應龍等將以某年月日葬公於某縣某地之
兆狀公事績官階乞余銘其幽隧吾聞攻毒之餌恆出於瘴癘之區亂
之興也其受亂之地必有人焉足以還自救也閩之亂亟矣莫甚於耿
與鄭耿之平也公既力諸原海氛之靖則施侯為之主而公寔贊之蓋
公所至以功業白顯而造功於閩為尤大余於公同為閩人又嫻好也
知公深誌其可以辭乎公生前丁丑十月初七日得年七十有六配夫
人蔡氏前公卒子男十人應麟布政司參議江西督糧道亦前卒應龍
刑部郎中候補副使道應鳳壬午舉人戶部郎中應鵬福建水師提標
游擊應鵬辛卯舉人戶部郎中應鶴歲貢生應樞應權應機應璋俱幼
應機余叔父永州總兵公壻也女五人皆適名族孫男十二人女十三

人曾孫五人公持身寬厚謹恪官於家門不縱不苛鄉人久安焉待族
嫻朋好有恩禮雖勳高爵大異於古名將怙侈驕暴者故能以功名終
著行間紀遇一編所錄皆實余嘗序而行之茲復誌公之概而系以銘

曰雲雷之屯君子經綸天造草昧以啟厥勳敵

王所愾綏我鄉人保斯土者人亦保焉望公松楸孰敢不尊千秋萬歲
式固汝原

儀吉案榕村集有吳將軍行間紀遇後序其言將軍始發跡於閩
及平海之役與施公合謀皆與此誌略同其後又有粉榆親串語
此誌謂余於公同為閩人又嫻好也知穆堂此篇代李文貞作也
又榕村集有賜示輓將軍吳英詩覆奏劄子而誌有
御製詩一章將以錫公語不及挽詩未知是一事否當攷

福建提督藍公理家傳

藍鼎元

公諱理字義甫號義山福建漳浦人少桀驁自大不屑與羣兒偶長益
卓犖偉軀幹虎頭燕頤巨目豐頤口可容拳力舉八百鈞足追奔馬曳
其尾倒行刀盾鎗礮靡不精絕時拊腹跳叫曰丈夫不封侯拜將非人

也年十六無以資生或勸之業染笑曰君子固窮吾姑試為之設缸置

龍收里布躬染濯一日遇族叔贊皇于道見手青問何為以實告贊皇

怒舉扇撲其額罵曰天生一具銅筋鐵肋不立功萬里外作此不肖可

鄙公矍然歸持斧擊龍缸破之集族中雄健者十五人謀曰我欲為國

家出力顧世莫我知無尺寸憑藉今海寇盧質擁眾嵩井尾間荼毒

生靈我與若往殺之官以吾為能必聞於朝用吾矣皆曰善遂行出洋

尾橋招邀得五才人至岱嵩屯駐盧質居井尾隔一江遣二小賊遊巡

公傳言吾欲與質鬪令質來質聞率眾三百至公號然大笑曰人言盧

質英雄偽耳質曰若何名公曰豈不聞藍理質曰乳臭耳吾安得聞之

公曰吾素聞若勇今始知若非勇若所恃二三百人耳假令二三百人

弗動手獨若隻身與吾鬪吾擒若矣質喜曰有是哉令軍皆壁立毋擅

動質與公各攜籐牌短刀躍出沙場鬪百合不分勝負盧質有名劇賊

身長七尺餘白面長鬚揮刀盾如閃電百夫莫能當其勇兒公少年心

易之至是始知為勁敵悉殫其技不能勝公度質氣餒忽虎吼大呼曰

著矣質愕然跣出盾外公截其趾顛遂斬之謂其眾曰降者免賊眾皆

降其副王都聞之亦降公議馳詣郡獻功都請緩數日言有仇欲報實

潛出剽掠後以傷卒公始自詣郡郡中當事方疑公作賊又慮海寇侵擾戒嚴公指天誓日言屠賊狀弗信逮公于獄雜羣賊中鞠治之爰書置極刑屆期將斬計五十有三人議留一人緩死待後來者令掣簽公曰死則死耳何掣為羣賊向前競掣之遺一簽于地公曰地上者予我官揭視之乃生字由是五十二人皆斬而公獨留久之同繫有謀越獄者事洩當斬將及公迅雷忽作晝昏似夜當事度其冤乃止然終不能出獄公亦晏然無出意日東芻捆屨以為食康熙甲寅靖藩耿精忠叛悉縱繫者令更衣赴藩下授職公曰我豈從賊作亂之人哉間道走上游出仙霞關聞親王統大師討逆星馳迎之具陳平閩策王嘉其忠令隨征為前導屢立戰功奏授松溪營遊擊未幾遷灌口營參將灌口地當孔道軍興旁午供億甚繁閩督姚公啟聖駐漳籌海每使過有誅求公不應且執而鞭之由是諸使皆潛公姚糾公虛兵冒餉革職永不敘用公有卒鬪殺人當死公憐其母寡無昆弟白之官曰殺人者我也卒無罪得免死置公于理公在獄又經年始獲釋歲癸亥大興師去不日朝廷以鄭氏父子竊踞澎臺數侵擾泉漳為邊患議大興師去不日命靖海將軍施公琅往剿滅之施名宿老將善用兵聞公英勇奏請隨

師平賊檄署提標右營遊擊領前隊先鋒公喜得遂報國志日在廈門練習水戰教演行陣有二卒出市薪蔬遇將軍標噶叭什觀劇使酒擒二卒撻之併詆公革職之員不可為將卒歸愬公笑曰汝曹鬪毆常事且問汝勝耶負耶卒曰受撻耳何敢爭勝負公怒命斬之曰汝二噶叭什不能勝何能殺賊卒呼冤曰我等以主帥內標姑讓之請復與鬪如不勝願斬公縱之再鬪曰勝矣大勝矣喜命二卒仆門板上刺一雞淋之昇以隨往見將軍請發噶叭什二人者付懲治施公不可公固請曰今行軍用人之始士卒不敢愛軀命為將軍出死力將軍宜一體撫恤之惟公惟溥可服人心噶叭什小輩恃將軍親暱無故鞭撻士卒且當眾大言謂某革職之員不堪為將損先鋒威重搖惑眾心將軍不發此二人付某懲治恐軍士人人解體也施公不得已付之公馳至營遣卒齎公文飛報將軍曰今日上吉先鋒啟行殺賊即詣海岸祭江綁噶叭什二人斬之轟然大礮九聲順風揚帆而去施公聞之不悅既而曰虎將也必成功命治裝統諸軍繼之公帥師直抵澎湖鄭氏將曾遂等以數萬眾迎敵戰艦蔽江公奮勇與戰自辰至午益力忽有賊礮斜飛過公腹公偃曾遂呼曰藍理死矣公次弟瑤從背後扶公

起立公空拳虎吼大呼曰藍理在曾遂死矣喚草茵持刀來連呼殺賊者三聲如巨雷舟中軍士皆氣壯無不一當百草茵族子法別號也持刀授公見公腹已破腸流出外爲掬而納諸腹中公四弟瑗傳以衣五弟珠持匹練連公腹背交裹之公大呼殺賊不暇顧伊時賊舟競進以鐵鉤鉤住公舟我師亦飛鉤鉤賊舟火箭火龍火罐彼此對擲烟焰漫天賊中有飛天鼠者沿大桅而上伏蓬陰銜刀捫繩負蓬而立羣賊轉蓬向外則持刀飛跳下我舟公弟瑤揮刀斬之賊人氣喪我軍賈勇先登公命以火藥桶盡傾賊舟燔斃賊無數沈其二艘賊大敗逐北數十里棄械浮屍盈海面遣弁赴將軍報捷施公大喜拜疏上公首功親至公舟慰勞有紅彝醫藥極神效命醫公醫言須七日勿動氣乃可平復施公曰大功已成安臥十日可也其後施公將戰戒左右勿使公知將帥齊出千艦競奮賊悉銳拒我師日中小卻施公以大眾犁之過猛艦擱淺沙不能動羣賊環焉施公故善戰神閒氣定不以遇淺故挫衄賊見蓬上書中軍二字弗知其爲施公遙望總兵吳公英一船高牙黃纛甲帳甚盛以爲此真將軍多趨赴敵然潮漸退淺益甚施亦未得突圍出謀者飛報公左右偶語曰將奈何公聞問故給曰無之公拔劍起大

驚乃言將軍遇淺被圍狀公傳令往救左右弗能止遂行時諸將所乘舟皆書官爵姓名蓬上字大二尺許遠難辨獨公舟止書藍理二字字方廣各二丈賊遙望見相謂曰藍理來矣稍卻公追擊大敗之奪賊舟請施公更舟施執手慰勞曰愛我也但醫言七日勿動氣是以戒左右無令公知今方三日奈何遽動公笑曰主帥被圍吾安忍偷生卽瘡裂以死亦有天定無悔也於是與施公乘勝殺賊賊大敗死傷不計窮追至西嶼頭賊退守城壘不敢出施復拜疏上公功數日公瘡平復與施謀出輕師以擾之賊數敗首尾不能相顧大困弗支鄭克塽聞之懼遣使納降我師入臺灣百姓安堵海疆底定朝旨以公血戰破敵功在首先遇缺先用而公以二親且老乞歸省弗赴未幾丁父艱服闋又越二載戊辰始入都過趙北口遇聖駕出水圍將迴避騎凝立道中弗肯行鞭之數十不動乃舍騎步入梁園中

駕至遣侍衛問誰騎公乃出曰臣藍理從福建來者上問是征澎湖拖腸血戰之藍理否公奏曰是上曰來何遲也召至前問血戰狀解衣視之以

御手撫摩傷處嗟歎良久復

召至行宮極慰勞廷授官部臣以公革職閒員擬守備弗可擬遊擊

賜帑金三百兩未行

特授宣化府總兵官掛鎮朔將軍印越三載以海洋多盜調補浙江定海鎮在浙十餘年四署理提督事兵民相愛山海肅清修定海文廟祀忠烈墾荒蕪築道頭通洋船海外蒼黎欣欣大有起色焉尤重斯文禮賢士諸生單寒者必周恤培植之鄉會大比皆資行李之費浙人士藉藉弗衰每遇

上南巡接駕或入京陛見恩眷之隆羣臣無比

上常向諸王大臣言公拖腸血戰狀又引見

太后曰此破肚總兵也蓋愛公如家人婦子

賜賚優渥不可悉數公每敷奏侃侃指畫或手舞足蹈

上嘉其真率手書所向無前及勇壯簡易匾額

賜之尋以天津為京東重地調公鎮守公以畿輔產米無多而天津一望平原皆沃衍閒曠可濬河引水開灌稻田率兵疏鑿躬胼胝負土築

堤市牛種農具募民耕種得水田數百頃歲收稻穀

上俱以賜公丙戌遷福建陸路提督調公五弟獨石路參將珠赴天津

接管營田事公至閩見桑梓父老歔歔太息道及微時顛沛事慨然有

廣廈千萬間盡庇寒士之意地方鼠竊盜賊搜除廓清盡撤街巷柵欄

曰此非弭盜乃弭捕盜者漏下三鼓城門洞開民間夜戶不閉行旅戴

星往來遺貨物于道無敢拾取數郡人民安樂之時詢疾苦聞文武胥

役弄權舞弊以及勢豪大惡訟師棍徒削人民悉關白當事按法區

處親近者竟自治之堪輿家言漳郡人文鬱塞乃後山仙殿壓學宮地

脈東南田裏港未築水門直瀉所致公毀仙殿大興工役填築田裏港

又以江東橋被賊斷後險渡狂瀾民苦病涉倡修江東大石橋二役費

須鉅萬公借諸文武官紳捐貲不足則以郡人之不孝不弟為富不仁

者罰出緩附益之又狹小市廛制度築漳州浦頭石碼泉州新橋安海

沙溪塗嶺行鋪千百間大開街衢便民貿易常曰以地方不義之財為

地方萬民之利可以勸孝弟抑豪強轉移風化莫善於此或曰此有司

事非所宜公怒曰天下官管天下百姓腐儒何足以知之由是告訐不

法事者日接踵差弁勾攝絡繹於道而假威藉叢之輩紛紛四出富人

重足而立矣公左右親暱多陰交泉郡土究偵訪素封詭稱公令恐嚇之獲利無算或遇豪黠不聽從則以抗拒爲大辱又不敢明目向公言伺公遊行處隔牕偶語故作嗟歎不平聲公聞問故則故匿不言再問尚吞吐其說似絕不經意者公性急不能休乃言某某爲富不仁極害人不堪之處或暴橫孤寡諸非人類所爲事公曰豈有此理世間無官法耶復極言勢力浩大官吏莫敢攪公曰治之則後此諸事皆公所爲其人不能支必請托左右納賂求解凡出入公門者皆致富而惡名盡公受之泉郡勢豪妬公者刻匿名帖繪一虎以比公多列條款傳播京師聲名大壞辛卯秋以漳平陳五顯盜案解任壬辰入都值覺羅滿公保出撫閩據虎帖參劾

上命侍郎覺公和托廖公騰燿偕總督范公時崇巡撫滿公保並按之左右不肯承公曰吾大臣何必辯舉筆署曰皆實擬極刑追贓八萬家產皆籍入官

上念公功免死挈家歸旗俄以西藏用兵命之軍前效力有進戰退守移營就糧數事合機宜上深嘉之赦免所追贓而閩中家產俱經有司變鬻一空無復有立錐

地矣越數載以老得

賜還京康熙五十九年卒年七十二公生平躁急性發如雷霆過卽忘之無藏怒宿怨劇談大笑聲聞里許惟好自尊大不服人尤善罵凡權勢赫赫位在其上者多倨侮挫之以示天下莫己若遇才人傑士雖寒賤徹骨亦必折節禮下以此人服其藻鑑教家勤儉衣食粗糲無所擇家奴悉珍饈自奉草蔬敗肉皆留以待公公亦甘之好書大字濡毫伸紙有求無不應者諸弟皆以平臺功加左都督最著者次諱瑤公功烈居多未仕卒四諱瑗公仕至福建金門總兵官亦喜書大字拳能入口揚盾一躍三四丈五諱珠公累官參將英勇不讓諸兄而好學聰敏能背誦朱子綱自始終不遺一字文人畏之公有子六人長國英歲貢生次文魁太學生早卒三國庭辛卯科副榜貢生以軍功候選郡司馬四國定歲貢生五國柱六國桂皆效力

禁門並授京營千夫長康熙六十一年壬寅秋

賜公家屬出旗仍還閩省爲民籍護其喪歸葬

論曰公一代虎將也起草茅建奇勳生平舉動種種異人可不謂非常之傑乎使公稍謙慎自持或官非梓里急流勇退千載猶將慨慕之以

好大喜功卒為左右所蒙垢晚節弗完深可惜也然公之奇氣終不可沒拖腸血戰功在

社稷未可以儒者潔清之操墮國家干城之彥庶幾乎論得其平哉

廣東副都統陳公昂墓誌銘方苞

公姓陳氏諱昂泉州人世居高浦

國初遷濱海居民徙灌口父兄相繼沒以母寡艱生計遂廢書賈海上

屢瀕死往來東西洋盡識其風潮土俗地形險易康熙癸亥

上命浙閩總督姚啟聖經略臺灣遣靖海伯施琅統諸軍進戰求習於

海道者公入見時制府以水戰宜乘上風公獨謂北風剽勁非人力可

挽船不得成鯨不若南風解散可按隊而進施意合遂參機密將至澎

湖北風大厲氛霧冥冥晝面不相覿三日軍中恫疑公進曰此殺氣也

將軍毋以父兄之仇欲效楚伍員倒行而逆施乎將軍曰然則吾誓天

公手案以進誓畢風反日暉遂克澎湖歸疾疢傷者於臺灣其吏卒

大喜鄭氏遂歸命兵不血刃策勳授蘇州城守一調再遷而至碣石總

兵官擢廣東副都統皆濱海地也嘗奏請西洋治象數者宜定員選毋

多留其留者勿使布其教於四方自開海洋登萊江淮間海船至菽粟

布帛即騰踊僉曰內地年登而穀貴職此之由久之語上聞

命盡閉海洋公聞之獨曰南洋非此倫也吾少歷諸番皆習耕稼無資

於中國或海壩毀饑商船尚以諸番之米至今概絕之則土貨滯積而

濱海之民半失作業欲上言會疾作將終命其子以遺疏進眾皆疑焉

叩之閩人則曰斯言也其信公之子倫炯介吾友楊君干木請銘余既

奇公之跡又其言宜考信於後乃受其請而譜之公歷官皆能其職有


遺施在人卒年六十有八父諱健前母許氏母王氏自曾祖以下皆受

一品


錫命夫人林氏子三人長倫炯次芳次倫焜以某年月日葬公於某鄉

某原銘曰

迫為生海之涯備諸艱危榮遇亦由茲志願無餘安以反其居




碑傳集卷十五




貴筑黃彭年編訂





70043347



7